

1070. Oct

Wurde an abt. Hildegard  
in Königsberg


Selbstsch. 27.

D 10




2






3.

















**Feurzeug**  
**Christentlicher**  
**andacht.**

1536



Ob. C. II. 7489



## Vorrede.

**E**tt der allmechtig gepot durch Mo-  
sen/Leuitici am. 6. das auff seinem Al-  
tar das feuer ewig solte brennen/ vnd nymer  
verleschen/ das ist ein figur gewest zu bedeu-  
ten/das vnser hertze in stetter andacht gegen  
Got entzündt sollen sein/ tag vnd nacht/ von  
seinem gesetzs tichten/ vnd on vnderlaß betten/  
dan Gott will solliche andacht von vns ha-  
ben/ das wir vnser hertz allwege zu jm auff-  
heben/ vnd all vnser leben nichts anders sey/  
dann ein stettigs lob vnd Gottes dienst/ also  
das wir in ymmer preysen/ loben vnd danc-  
sagen. Darumb spricht er/ Psalm. 50. Wer  
dancpoffert der preysset mich/ vnd da ist der  
weg das ich jm zeyge das heyl Gottes/ Sol-  
liches geschicht wenn wir sein gnedigs wort  
vnd milte verheysungen fleysig üben/ Deu.  
33. dann zu seiner rechten handt ist ein feurigs  
gesetzs/ vnd sein wort ist mit feuer wol durch-  
leutert/ Psalm. 119. Wenn wir dasselbige be-  
trachten/ so wirdt vnser hertz entzündet/ Gott  
zu lieben vñ loben/ Darumb ist auch der Prie-  
ster ampt/ das sie mit leren vnd exempel/ sol-  
lich feuer schüren/ holz vnd Brandopffer dar-  
an legen/ das ist/ die Artickel des Glaubens/

Bitte des Vater vnsers vnd Zehen gepot/als  
darinne Gottes wille vnd verheyssungen für  
gehalten werden / zu übung Chriſtenlichs  
glaubens vnd liebe/stets fürbilden/als darinn  
die Summa Chriſtenlicher zucht verfaſſet/ vnd  
rechte Chriſtenliche andacht erweckt wirdt/  
Dañ diſes iſt der Chriſten weyßheyte bey allen  
völkern zurhümen/ Deute. 4. das Gott ſich  
zu jnen naht/ ſo offt ſie in anruffen/ des hertz  
vnd gnedigen willen ſie erkennen/ derhalben  
nütz vnd gut iſt/ diſe zucht in lere/ predigens/  
ſingens vnd allerley weyſe fleißig zutreiben/  
fürderlich aber gebets weyſe wie in diſem büch  
lein gar feyn abgemalet wirdt/ dañ Gott kein  
angenemer opffer kan geſchehen wan ein an-  
dechtigs hertz das ſich in in ſchmückt vnd  
erhebt/ mit liebe/ forcht/ danck vnd loße/ wie  
David ſpricht/ Die opffer die Gott gefallen  
ſind ein geengſter geyst/ ein geengſter vnd zu-  
ſchlagen hertz würstu Gott nicht verachten.

Zu ſollichem werck das hertz zubewegen/  
wirdt diß büchlein faſt wol dienen/ als das in  
ſunderheyte die begird vnd andacht zu Gott  
erregt vnd anzündt/ alſo das man in lerne  
fürchten/lieben/loßen vnd für augen haben.

Wöcht auch wol genent werde/ *Itinerarium salutis*/ ein wegebericht zum heyl vnd

seligkeit. Weyl David Gottes loß ein weg  
zum heyl nennet/ aber doch wöllen wirs an-  
ders tauffen vnd nennen ein feuerzeüg ic. als  
das ein feuer im hertzen anzündt/ welliches  
vnsrer lieber Herr Jesus Christus auff erden  
hat wöllen senden/ das es brennen solt/ vnd  
die menschen zu Gott treyßen/ Man hat vil  
Bethbüchlein mit hohen Titeln lassen auß-  
gehen/ der Seelen wurtzgarten/ Erznei/ Pa-  
radis vnd dergleichen/ die mag ein yeder nach  
seinem verstande vrteylen/ Dises aber sol ein  
übung vnd anreyzung sein zum glauben vñ  
liebe/ dardurch Gottes reich erlanget wirdt/  
Darumb heyst es ein feuerzeüg des gebrauchs  
halben/ zur andacht nach der materi oder süß-  
lect/ die Chrißlich sey vñ nit gleißnerisch nach  
der art/ Dañ Gottes wort handeln im predi-  
gen/ Beten/ singen/ lesen/ hören oder betrach-  
ten/ reynigt das hertz/ stercket den glauben/  
füret zum hymelreich/ gibt ewige gerechtig-  
keit/ meret die Chrißtenheyt so Gottes reich  
ist/ Belüßiget im geyst/ vnd machet das man  
Gott recht preysset vnd jm im geyst dienet.

Darumb als offte dein hertz verfinstert/ er-  
kalbet/ verstecket vnd verherttet wirdt/ so nimß  
disen feuerzeüg für die handt/ ließ vñ betrach-  
te darinnen/ so wirst du on zweyffel feuer der



andacht darauß empfahen/als ob stabel vnd  
hertter stein da weren.

In sunderheyt aber ist solliches feuerzeugs  
von nöthen zu diser letzten ferlichen zeyt/ da  
wir im finsternuß/schattē des todts vñ fremß  
dem landt ferne von Gott sigen/ da niemand  
für frost bleybē kan/ er werd dan durchs wort  
Gottes erwemet vnd erweychet/ allermeyst  
in Reußen/Preußen vñ andern landen gegen  
Mitternacht/da vilfeltige Abgötterey vñ al-  
ter her geweest/ das Euangelion nie lauter er-  
schollen/vñ der Sathan sunderlich vilfeltige  
gespenst pflegt zu treyben ic. Derohalben von  
nöthen ist/abents vnd morgens/ in glück vnd  
unglück/Bey tag vnd nacht/ in wachen vñnd  
schlaffen/dises feuerzeuges zu brauchen/ vnd  
den Camin zu Zion darmit anzünden/ Wenn  
du früe wilt auffstehen/nidergehen/essen/rath  
schlagen/ handtieren/ arbeyten/ federspill ha-  
ben oder sunst etwas fürnemen/ so nimb disen  
feuerzeug vnd schlage darmit ein liecht vñnd  
feuer in deinem hertzen auff/ auff das du alle  
ding mit Chüstlicher andacht vñnd reychem  
glauben nach Gottes wort vnd willen thuest  
vnd die seligkēyrt erlangest/ Amen.

Die Zwölff Artickel Christ  
lichs glaubens/ Bets  
weyse.

**I**ch glaub in Gott den all-  
mechtigē Vater/ Schöpf-  
fer des hymels vnd der er-  
den/ als in dich meinen al-  
ler gnedigsten Herrn vnd Barmhertz-  
igsten Vater/ Der du von meiner we-  
gen/ hymel vñ erden geschaffen hast/  
vñ alles was drinnen ist/ Auch mich  
vber dasselbige/ als dein liebes kindt/  
auf väterlicher gnaden/ einen herren  
vnd erben gemacht/ darinn zu bley-  
ben vnd leben ewiglich/ Wiewol ich  
bekenne/ das wir menschen dise gna-  
denreyche kindtschafft/ würdigkeyt  
vnd erbschafft/ durch den vngehor-  
sam Adams/ verloren haben/ Doch  
setze ich inn dich/ als inn meinen aller

A iiii





gnedigsten Vater/ alle meinen trost/  
hoffnung vnd vertrauen/ Vnd byn  
sycher vnd gewiß/ das mir solch fall/  
vnshedlich vnnnd vnuerdamlich sein  
wirdt.

Ich glaube auch in Jesum Chri-  
stum deinẽ eingebornen Sun vnsern  
herren/ Das er mir disen fall/ gegen  
dir meinen Vater/ versõnet hat/ zwis-  
schen dir vnd mir armen stinckenden  
sünder/ fridgemacht/ Vnnnd mir die  
erbschafft/ durch seinẽ gehorsam wi-  
derumb erworben / Vnd mir auff s  
newe/ durch sein heyliges wort gege-  
ben/ dein kindt zu werdẽ im glauben/  
Ich hoffe vnd vertrau jm gantzlich/  
er lasse seinen heylsamen vñ tröstlich-  
en namen Jesum (denn ich glaub das  
er sey warer Gott vnnnd mensch) an  
mir elenden stinckenden sünder/ nicht  
verloren werden/ sondern erlöse mich

(nach deinem worte) von alle meinen  
missethaten vnd sünden.

Ich glaube auch vñ bekenne/ mein  
Herr Jesu Christ/ das du empfangē  
bist/ von dem heyligen geyst/ on allen  
menschlichen samen / Geboren vonn  
Marien der reynen vnbesleckten vñ  
ewigkeuschē juncckfrawen/ Auff das  
du mir vñnd allen glaubigen menschen/  
widerumb bringest vnd erwür-  
best vō deinem hymnischen Vater/ die  
gnade des heyligen geystes/ die mir  
entzogē war/ vō wegen meiner sünd.

Ich glaube vñ vertraue/ das der  
heylige geyst in mich kummen sey/ Vnd  
die krafft des aller höchsten Gottes/  
hat meine seele ( wie Marien) vmb-  
schattet vnd vmbfangen/ damit ich  
einen newen menschen empfangē/ vñ  
also in deinem ewigbleybenden leben-  
digem vnd vnuerstörlichem wortte/

widerumb newe geboyn werde/ vnd  
sehen müge das reych Gottes/ Denn  
du bist ja des lebendigen Gottes sun/  
vñ darumb mensch worden/das wir  
elenden menschen/von vñser sündlich-  
en geburt/durch deine heylige vnbe-  
fleckte geburt/als auß gnaden gerey-  
niget/ vnd durch dich kinder Gottes  
geworden.

Ich glaube vnd bekenne auch/das  
du gelitten hast vnder dem Richter  
Pontio Pilato/ gecreuziget / gestor-  
ben vnd begraben worden/ Vnd das  
alles von meiner sünden wegen/ auff  
das du mich von dem ewigen Creutz  
marter/ leyden vnd todt/ durch dein  
Creutz/leyden/angst vnd not / mar-  
ter vnd bitterlich sterben/auch durch  
dein rosenfarbes blut / erlösest vnnd  
kaufftest/ Inn dem denn deine aller-  
gröste vnnd höchste liebe / gegen vns

armen menschen erkennet wirdt/ deñ  
du hast vnns ja also dein schweres  
Creütze/ in ein leycht joch/ dein bitter  
leyden inn eine vnuerגעckliche freu-  
de/ vnd deinen grymigen todt/ in ein  
ewig lebē verwandelt/ Darumb sag  
ich dir lob vnd danck mein gnediger  
Herr Jesu Christe/ ymer vnd ewig-  
lich.

Ich glaube auch vñ bekenne/ mein  
Barmhertziger Christe/ Das du zu  
der hellen herunder gestigen bist/ den  
Teuffel vnd alle seine gewalt/ list vñ  
Bosheyt/ mir vñnd deinen glaubigen  
zu dempffen/ vñ gefangen zu nemen/  
das mir der Teuffel hynfñrt nit scha-  
den kan/ vñ mich von der hellen peyn  
erlöset/ den selbigen auch vnschedlich  
vnd verdienstlich gemacht/ Vnd am  
dritten tage/ geyst/ seele vñnd leyß im  
grabe widerumb mit einander ges-



eyniget/vnd als ein starcker vñ mechtiger vberwinder des todtes/der hellen vnd des Teuffels/ von dem todte wider auffstanden/ von vnser wegen/damit alle die/ so in dich glauben nicht verderben/sundern in dir vberwunden die sünde/ todt / helle vñnd Teuffel/vñ das ewige leben (als deine miterben vnd Brüder) erlangen.

Ich glaube auch vñ bekenne mein Herr Jesu Christ/das du nach vierzig tagen/inn welchen du auff erden gewandelt hast zu einem gezeügnuß deiner freudenreichen aufferstehung bist auffgefahren in die hymel/vñ dich gesetzt zu der rechten deines hymelischen Vaters/in gleicher gewalt/glorien vnd preys/mit dem Vater/ als vnser einiger fürbitter/mitler/gnade/thron vnd versöner gegen dem Vater/der dir alle gewalt geben hat/ vber alle

seine gütter/im hymel vnd auff erden  
Da sitzest du mechtig vnd starck/ zu  
helffen allen gläubigen/ die jr ver-  
trawen/ trost vnd hoffnung in dich  
setzen/ vnd zu dir schreyen vnd rüffen/  
in allen jren nöten/ Du heyssest auch  
alle die beschweret sind/ zu dir kum-  
men/ vñ wilt jren rwe schaffen/ Der-  
halben ist's on nott/ mein sanfft mütiz-  
ger Christe/ dich weder hie oder dort  
ja weder in der wüstung oder auff  
dem berge/ noch zu Jerusalem/ dich  
anzubeten/ Denn man findet dich da  
sitzen zu der rechten deines hymlich-  
en Vaters/ wie dich auch der heylig  
Steffanus gesehen hat vñ angebet.  
Es ist auch vmb sunst einen andern  
fürsprecher zu suchen/ du bist es allein  
vnd wilts allein sein/ vnd wirst dise  
eere keinem andern geben/ Welcher  
anders glaubt/ der ist lügenhafftig.

Ich glaube vñ bekenne auch/ das  
du von dannen her/ zukünfftig bist/  
zurichten die lebendigen vnd die tod=  
ten/auff den tag des jüngsten gericht=  
tes/welcher allen gotseligen mensch=  
en/ ein sunderlicher erwelter vñnd  
freundlicher tag sein wirdt/Als denn  
werden wir sehen/ von angesichte zu  
angesichte vnsern Gott vnd heyland  
in seiner grossen glorien vñ mayestet  
kumende in der wolcken des hymels/  
Als denn wird da ein ende nemen/vn=  
ser fleyschlich sündlich vnd gotloses  
leben/da wirt empfahen ein yegklich  
er nach deiner zusage/das lohn seiner  
werck/ Welche wol gearbeyt haben/  
werden gehen inn das ewige leben/  
welche aber vbel/ in das ewige feuer.  
O mein Herr Jesu Christe/ verkürtz  
dise tage/vnd kumb zu vns balde her=  
ab/doch gib vns gnad vñ krafft/vn=



ser leben inn mitler zeyt also zufüren/  
das wir würdig seyen/ deine gnedige  
vnd süsse stymē/ denn mit freuden zu  
hören so du wirst sagen / Kumbt jr  
gebedeyten meins vaters / ererbet  
das reych/ das euch bereyt ist von an-  
begyn der welt/ Denn ich bin hunge-  
rich gewesen/ vnnd jr habt mich ge-  
speyset/ Ich bin durstig gewesen/ vnd  
jr habt mich getrencket/ Ich byn ein  
gast gewesen/ vn̄ jr habt mich beher-  
berget/ Ich bin nacket gewesen/ vn̄ jr  
habt mich gekleydet/ Ich byn frantz  
gewesen/ vnnd jr habt mich besucht/  
Vnd ich byn gefangen gewesen/ vnd  
jr seyd zu mir kummen/ Warlich ich  
sag euch/ was jr gethan habt einem  
vnder disen meinen geringsten Brü-  
dern/ das habt jr mir gethan/ Aber  
den vnglaubigen/ verzagten/ verban-  
ten/ vnkeuschen/ eebrechern/ seuffern/

gotpflasterern/ hoffertigen/ neydischen/  
en/geytzigen/ raubern/ tyrannen/ ab-  
göttischen vnd lügnern/ wirdt jr vr-  
teyl sein/ damit man sie mit schwefel  
vnd feuer verbrennen wirdt/ Darfür  
Behüt vns allzeyt/ O gnediger vnn-  
d gütziger Herr Jesu Christe.

Ich glaube auch inn den heyligen  
geyst/ der da aufgehet vom Vater  
vnd dem Sun/ vnd doch mit ein ey-  
niger vnd warer Gott ist/ der da al-  
le ding heyliget/ vnn- on in ist nichts  
heylig/ in den setze ich alle meinen ver-  
trawen/ das er mich wirdt leren alle  
warheyt/ mir meinen glauben sterck-  
en vnd meren/ vnd das feur seiner lie-  
be in meinem hertzen/ durch sein hey-  
ligs eingeßen/ auffblasen vnn- recht  
anzünden/ damit ich brenne inn wa-  
rer vngeserbtter vnd Christlicher lie-  
be/ gegen Gott vnd meinem nechsten/  
Das

Das Bitt ich dich herzlich mein Got  
mein Herr/ mein tröster/ mein hoff-  
nung vnd zuuersicht.

Ich glaube auch vnd bekenne/ ein  
heylige gemeyne chrißtliche kirche/  
Das ist ein gemeynschafft der heylig-  
en/vñ ein Bruderschafft viler frum-  
men vnd glaubigen menschen/ die da  
eintrechtigklich bekennen einen Her-  
ren/einen Gott/einen glauben/ vñnd  
ein tauffe/durch das eyenige lebendi-  
ge wort Gottes/also versamlet/ auff  
gericht vñnd regiert auff erden/ ja  
gantz schöne vnd on alle mackel vn-  
yrrig/reyn on alle runzeln vñnd vn-  
streflich.

Auch bekenne ich offenlich/das du  
mein Herr Jesu Chriße/durch dein  
rosenfarbes Blut / die kirche selbs ge-  
heyliget hast/seyest auch jr heüßet vñ  
Breütigam/vnd wirfst auch biß auff s

B



end der welt bey jr sein/ O mein Got  
laß mich vñ alle christglaubige mens-  
schen/in diser kirchen endtlich behar-  
ren vñnd erfunden werden/ also das  
wir eintrechtigklich mit jr glauben/  
lernen vñd halten/ alles was du vnns  
Befilhest durch dein wort/ auch alles  
das dargegen befunden/ das du nit  
gepflanzet hast / möge durch dein  
wort außgerottet werden / auff das  
wir mit keinerley menschen ansehen/  
gesetze oder lere der alten oder jungen  
Väter/ Besten/ Concilien/ Hohen-  
schülen oder des alten Brauchs/in yr-  
thumb gefüret werden/ Mein Herr  
Jesu Christe/ richte wider auff die  
zwo Bündnuß / nemlich die wasser-  
tauffe vñd das Abentmal deines ab-  
scheydens/ mit welchē du deine Braut  
außwendig vmbgürtet hast vñnd  
vmbgebunden/ Deñ es sey deñ sache

das die zwey stücke/ nach deiner ein-  
satzung vnd ordnung/ wider auffge-  
richtet werden/haben wir vnder vns  
weder glauben/ lere / kirche / glaube/  
Brüderliche straffe/weder Bañ noch  
aufschliessung / on welche ding es  
nymmer mer wol stehen kan in dei-  
ner kirchen.

Ich glaube auch vnd bekenne/ver-  
gebung der sünden/also das dise chri-  
stliche kirche/die schlüssel/befelch vnd  
gewalt/ vonn dir Herr Christe em-  
pfangen hat/dem sündler damit auff  
zu schliessen/als offft er rewe vnd leyd  
vber seine sünde hat/ Die pforten des  
hymels/ vnd inn die heylige gemeyn-  
schafft der Christglaubigen/ als den  
verlorenen sun/ vnnnd des bussfertigen  
bey den Corinthern/ wider anzune-  
men/so er/nach dem er zweymal ver-  
manet ist/ abstehen will. Ich glaube

auch warhafftig vñ gewislich/ das  
dise kirche auch gewalt habe/ densel-  
bigen außzuschliessen/vñ in als einen  
Zölner vñnd Heyden zu halten/Hie  
glaube ich vñ Bekenne öffentlich mein  
Herr Jesu Christ/das die/welche die  
Christliche kirche also auflöset auff  
erden/auch gewislich auffgelöset/vñ  
von iren sünden entpunden sind im  
hymel/Widerumb/welche die kirch-  
en pindet/vñd auß irer gemeinschaft  
aufschleißt/auff erden/ das dieselbi-  
gen auch gepunden seind für Gott in  
dem hymel/vñnd auß der gemeinen  
Christlichen kirchen (außer welchen  
kein heyl ist) außgeschlossen/ wie den  
Christus seiner lieben Braut/ die bey-  
den schlüssel selbsts an die seyten gehen-  
get oder gegeben vñd befolhen hat/  
diuweyl er noch auff erden war.

Ich glaube auch vñd Bekenne eine



aufferstehung des fleysches/ Ja eben  
des leybes/ mit dem ich yetzt vmbge-  
ben byn/ Gott gebe er werde verzeret  
durch die wärme/ertrenckt/gehenckt  
oder verbrennet/ Vñ ob er mir gleich  
meine zeytliche eere/ gut/ leyß vnd le-  
ben genummen hat/ so werde ich doch  
erst/die rechte eere/die für Gott gilt/  
ein vnuergercklich gut/ einen vnleyd-  
lichen/verklerten/vnsterblichen leyß/  
vnd ein ewig leben/ auff den tag der  
frölichen aufferstehung/meines fleys-  
ches erst recht vberkummen/ O mein  
milter Herr Jesu Christ/sterck vñnd  
Behalt mich im glauben.

Ich glaube auch vnd bekenne/ein  
ewigs leben/das du mein Gott vnd  
Herr/deinen glaubigen vnd aufer-  
welten/nach disem elenden leben ge-  
ben wirst/so mit klarer vnd freuden-  
reycher anschawung deines götlich-

en angesichts Begaben / vnd in allem  
so sie Begeren / auch mit ewiger rwe/  
ewigem friede vñ ewiger seligkeyt er=  
settigen / Welche freude / wunne vñnd  
wollust / kein mensch ausspreche oder  
Begreyffen mag hie auff erden / denn  
kein aug hat gesehen / kein ohr hat ge=  
hört / es ist auch nie in eines menschen  
hertz gestigen / das Got bereydet hat /  
denen die in vñnn hertzen lieb haben /  
O heyliger Gott / O starcker Gott /  
O vntödtlicher Gott / das ist mein  
glaube / den ich mit dem hertzen vñnd  
mund bekenne / vñnd öffenlich für der  
Kirchen in der Wassertauffe Bezeuget  
hab / Ich Bitt dich treulich / wöllest  
mich gnediglich darinnen behalten /  
Bis an mein letztes endt / Vñnd ob ich  
schon auß menschlicher forchte vñnd  
Blödigkeyt / durch tyranny vñ mar=  
ter / schwerdt / feuer oder wasser / da=

non gedrungen würde/ So ruffe ich  
doch hiemit zu dir / O mein barm-  
herziger Vater / richte mich wider  
auff / mit der gnade deines heyligen  
geysts/vñ laß mich nit on disen glau-  
ben/ durch den todt abscheyden/das  
bitte ich dich von grundt meines her-  
zen/Durch Jesum Christum vnsern  
Herrn/erlöser vnd heylandt/ denn in  
dich gütlicher vñ barmherziger Va-  
ter/hoffe ich/laß mich in ewigkeith nit  
zu schanden werden/Amen.

**Der Decalogus/ Ein yeg-  
lich Gepot in ein geuier-  
des gesteller.**

**E**ch byn der Herr dein Gott ꝛc.  
Du solt kein ander götter haben  
neben mir ꝛc. Hie dencke ich erst-  
lich/das Gott von mir fordert vñnd



leret hertzliche zuuersicht zu jm in allen sachen/vñ ist sein hoher ernst/das er wölle mein Gott sein/vñnd dafür soll ich in halten/Bey verlust der ewigen seligkeyt/vñ das mein hertz sunst auff nichts soll Bawen noch trawen/es sey gut / eere / weyßheyt / gewalt / heylikkeyt oder eynige creatur.

Zum andern / dancke ich seiner grundlosen Barmhertzigkeyt / das er sich so väterlich zu mir verlornē menschen herunder sencket/vñd sich selbst/vngebeten/vngesucht / vnuerdientet/mir anbeütet / mein Gott zu sein / sich mein anzunemen/vñd in allen nöthen/mein trost/schutz/hilff vñd sterck sein wil/so doch sunst wir armen Blinden mensche so mancherley göter gesucht haben vñ noch suchen müsten/wo er sich nit selbst so offenlich hören ließe/vñd vns in vnser menschlichen sprach

sich anböte/das er vnser Got sein wöl  
wer kan jm dafür ymmer vnd ewig=  
lich gnug dancken?

Zum dritten/Beychte vnd bekenne  
ich meine grosse sünde vnd vndanc=  
barkeyt/das ich solche schöne lere vñ  
hohe gabe/durch mein ganzes leben  
so schendtlich veracht/vnd mit vnze=  
lichen abgöttereyen seinē zorn so greü=  
lich gereyzt haß/das ist mir layd vñ  
bitte vmb gnad.

Zum vierdten Bitte ich vnd spreche  
Ach mein Gott vñnd Herr / hilffe  
mir durch dein gnad/das ich sollich  
dein gepot/müget täglich ye besser ler=  
nen vnd verstehen/vnd mit hertzlich=  
er zuuersicht darnach thun/Behüt ja  
mein hertz/das ich nit mer so verges=  
sen vnd vndancbar werde/kein an=  
der götter noch trost auff erden noch  
in allē creaturn suche/sundern allein

reyn vñ feyn/ an dir meinem eynigen  
Gott Bleybe/ Amen/ lieber Herr Got  
Vater/ Amen.

**D**arnach/ so ich will oder  
zeyt hab/ das ander Gepot/ auch  
also ins geuierdre gedrehet also.

Du solt den namen des Herren dei-  
nes Gottes nit mißbrauchen ꝛc. Erst  
lich lerne ich/ das ich Gottes namen  
sol herrlich/ heylig vnd schon halten/  
nit dabey schweren/ fluchen/ liegen/  
nit hofferlig sein/ noch aygē eere oder  
namen suchen/ sondern demütigklich  
seinen namen anruffen/ anbeten/ prey-  
sen vnnd rhūmen/ vnd lasse das alle  
mein eere vnd rhum sein/ das er mein  
Gott ist/ vnnd ich sein arme creatur  
vnd vnwürdiger knecht byn.

Zum andern/ dancke ich der herr-



liche gaben/ das er mir seinen namen  
offenbart vnnnd gegeben hat/ das ich  
mich seines namen rhümen kan vnnnd  
nennen laß/ Gottes diener/ creatur ꝛc  
das sein nam mein zuflucht ist/ wie  
ein feste Burck (als Salomo sagt)  
zu welcher fleucht der gerecht vnnnd  
wirdt beschirmet.

Zum dritten/ Beycht vnnnd Bekenne  
ich meine schendliche schwere sünde/  
wider dis gepot/ mein lestag gethan  
da ich seinen heyligen namen/ mit al-  
lein vnangeruffen/ vngerümet vnnnd  
vngeeeret gelassen hab/ sündern auch  
vndanckbar für solche gabe gewest  
byn/ vnd derselben zu allerley schan-  
den vnd sünden mißbraucht hab/ mit  
schweren/ liegen/ triegen ꝛc. das mir  
leyd ist vnd bitte vmb gnad vnd ver-  
gebung ꝛc.

Zum vierdten/ Bitte ich vmb hilff

vnd sterck/ das ich hynfürt solch gepot wol lernen müg/ vnd behüt mich für solcher schendlicher vndanckbarkeit/ mißbrauch vnnnd sünden wider seinen heyligen namen/ sondern das ich danckbar erfunden werdt/ vnd in rechter forcht vnd eere seins namens.

Vnd wie ich droben gesagt hab im Vatter vnser/ also vermane ich abermal/ ob der heylige geyst vnder solchen gedancken keme/ vnd anfieng in dein hertz zu predigen/ mit reychen erleuchten gedancken/ so thu jm die eere/ laß dise gefassete dancken faren/ sey still vnnnd höre dem zu/ ders besser kan denn du/ vñ was er predigt/ das merck/ vnd schreybe es an/ so wirst du wunder erfahren ( wie David sagt) im geseze Gottes.

### Das dritte Gepot.

Gedenck das du den Feyertag heyli-  
gest. Hierinn lerne ich erstlich / das  
der Feyertag ein gesetz ist / nicht zum  
müssigang noch zu fleischlicher wol-  
lust / sondern das er von vns solle ge-  
heyliget werden / durch vnser werck  
aber vnd thun wirdt er mit geheyli-  
get / denn vnser werck sind nit heylig /  
sondern durchs wort Gottes / welch-  
es allein gantz reyn vnd heylig ist / vñ  
alles heyliget / was damit vmbgehet  
es sey zeyt / stet / person / werck / rühe &c.  
Denn durchs wort werden vnser  
werck auch heylig / Wie S. Paulus  
j. Thimoth. iij. sagt / Das auch alle  
creatur geheyliget wirt durchs wort  
vnd gepet / Darumb erkenne ich hier-  
inn / das ich am Feyertag solle zu for-  
derst Gottes wort hören vñ bedenck-  
en / darnach im selben wort dancken /  
Gott loben für alle seine wolthat / vñ



Beten für mich vñ alle welt/ Wer sich  
also helt am Feyertag/ der heyliget  
den Feyertag/ wers nicht thut/ der  
thut erger dann die dran arbeyten.

Zum andern/ danck ich in disem  
gebot/ für die grossen schöne wolthat  
vñnd gnade Gottes/ das er vns sein  
wort vñd predig geben hat/ vñ auff  
den Feyertag sunderlich zu üben be-  
solhen/ welchen schatz kein mensch-  
lich hertz gnugsam bedencken kan/  
denn sein wort ist das eyynige liecht in  
der finsternuß dises lebens/ vñnd ein  
wort des lebens/ trosts vñd aller se-  
ligkeyt/ vñnd wo das liebe heylsame  
wort nicht ist/ da ist eytel schreckliche  
greüliche finsternuß/ yrrthumb/ rot-  
ten/ todt/ alles vnglück/ vñ des Teuf-  
fels eygen tyranny/ wie wir täglich  
für augen sehen.

Zum dritten/ Beychte vñd Bekenne

ich meine grosse sünde vñ schendliche  
vndancckbarckeyt/ das ich die feyer=  
tag so lesterlich hab mein lebtag zu=  
bracht/ vnd sein theur werdes wort  
so jemmerlich veracht/ so faul/ vn=  
lüstig vnd vberdrüssig dasselb zu hö=  
ren gewesen/ schweyge das ichs hertz=  
lich begert oder yemals dafür gedan=  
cket hette/ Habe also meinen lieben  
Gott vmb sunst mir predigen/vnnd  
den edlen schatz faren lassen/ vnd mit  
füssen drüber gangen/ welchs er mit  
eytel götlicher gütte von mir gedul=  
det/vnd darumb nit abgelaßen ym=  
mer fort mir zu predigen vnd zu ruf=  
fen zu meiner seelen seligckeyt/ mit al=  
ler väterlicher götlicher liebe vnnd  
trewe/das ist mir leyd vnd bitte vmb  
gnad vnd vergebung.

Zum vierdten/bete ich für mich vñ  
alle welt/ das der liebe vater / wolte

vns bey seinem heyligen wort erhalten / vnd dasselb nit von vns nemen  
vmb vnser sünde / vnd danckbarkeit vñ  
faulheyt willen / Wolt vns behütten  
für rotten geystern vñnd falschen le-  
rern / sundern sende vns trewe vñnd  
frumē Pfartherr vnd Prediger / Ge-  
be vns allen auch gnade / das wir der  
selben wort / als sein selbs wort demü-  
tiglich hören / annemen vnd eeren / da-  
zu auch von hertzen dafür dancken  
vnd loben ꝛc.

### Das vierdte Gēpot.

Du solt deinen Vater vnd dein müt-  
ter eeren. Erstlich lerne ich hie / Got  
meinen schöpffer erkennen / wie wun-  
derbarlich er mich mit leyb vnd seele  
geschaffen / auß meinen Eltern das  
leben gegeben / vnd hat jnen das hertz  
gegeben /



gegeben / das sie mir / als jres leybs  
frucht / mit allē kresssten gedienet / zur  
welt bracht / mich geneeret / mein ge=  
wartet / gepflegt vñ erzogen mit gros=  
sem fleyß / sorge / fahr / mühe vnd ar=  
beyt / Vnd bis auff dise stunde / mich  
sein geschöpfse / an leyb vnd seele / für  
vnzelicher fahr vnd not behüt / vnnd  
auch oft außgeholfen hat / als schaf=  
fet er mich alle stundt auffs newe /  
denn der Teuffel vns nit ein augen=  
blick das leben gönnet.

Zum andern / danck ich dem reych=  
en gütigen schöpffer / für mich vnnd  
alle welt / das er inn disem gepot / ge=  
stift vnd bewaret hat / vermerung  
vnd erhaltung des menschlichen ge=  
schlecht / das ist / Haus vñ Stat we=  
sen oder Oeconomiam vñ Politiam  
denn on dise zwey wesen oder regi=  
ment / kōndte die welt nit ein jar ste=  
C

hen/ Weyl on weltlich regiment/ kein  
fride ist/ wo kein fride ist / kan kein  
hauf wesen sein/ wo kein hauf wesen  
ist/ da können/weder kinder gezeuget  
noch erzogen werden/vnd müste Va-  
ter vnd mutter stand ganz auffhö-  
ren/Aber dafür stehet diß gebot/vnd  
helt vnd bewart/ beyde hauf wesen  
vñ Stat wesen/ Gebeut den kindern  
vñ vnderthanen gehorsam/helt auch  
drüber/das es muß geschehen / oder  
wo es nit geschicht/ leß ers nit vnge-  
strafft/sunst hetten die kinder durch  
vngehorsam lengest alles hauf we-  
sen/vnd die vnderthanen durch auff-  
rur/das Stat wesen zurissen/vnnd  
wüß gemacht / weyl jr vil mer ist  
denn der Eltern vnd regenten/dar-  
umb ist solche wolthat auch vnauf-  
sprechlich.

Zum dritten/ Beycht vnnd bekenne

ich meinen leydigen vngehorsam vñ  
sünde/ das ich wider diß gepot mei-  
nes Gottes/ meine eltern nit geeeret/  
noch gehorsam gewesen bin/sie offt er-  
zürnet vñnd beleydigt/ jr väterliche  
straff mit vngedult angenummen/wi-  
der sie gemurret/jr trewe vermanüng  
veracht/vil mer loser gesellschaft vñ  
bösen bußen gefolget / so doch Gott  
selbs solchen vngehorsamen kindern  
flucht vñ langes leben abspricht/wie  
denn gar vil drüber auch schendlich  
umbkumen vñ vndergehen/ ehe sie  
zu leuten werden/Denn wer Vatter  
vñnd mutter nit gehorcht/ muß dem  
hencker gehorchen / oder sunst durch  
Gottes zorn bößlich vmb sein leben  
kumen zc. Solchs alles ist mir leyd/  
vñnd bitte vmb gnad vñ vergebung.

Zum vierdten/Bete ich für mich vñ  
alle welt/dz vns Got wolt sein gnad



verleyhen/ vnd seinen seggen reychlich  
aufschütten/ beyde vber hauf wesen  
vnd Stat wesen/ das wir hynfür  
frum̄ werden/ die Eltern eerlich hal  
ten/ den herrschafften gehorsam sein/  
dem Teuffel widerstehen/ vñ seinem  
reytzen nit folgen zu vngehorsam vñ  
vnfride/ vnd also mit der that helffen  
das hauf vnd landt bessern/ vnd den  
fride erhalten/ Gott zu lob vnd eeren  
vns selbs zu nutz vnd allem gutten/  
Vnd das wir solche seine gaben erken  
nen vnd dafür dancken/ Sie soll mit  
vndergehen auch das gebet für die  
Eltern vñnd Oberherren/ das inen  
Gott verstand vñ weysheyt verley  
he/ fridlich vñnd seligklich vns für zu  
stehen vnd zu regieren/ Er behütte sie  
für tyranny/ toben vnd wütten/ vñ  
wende sie dauon/ das sie Gotts wort  
eeren/ nit verfolgen/ noch yemand vn-

recht thun/ Denn solche hohen gaben  
muß man mit beten erlangē/ wie S.  
Paulus leret/ sunst ist der Teuffel der  
öberst Abt zu hoff/ vnnnd gehet übel  
vnd wüß zu.

Vnd wenn du auch Vater vnnnd  
mutter bist/ so ist's hie zeyt/ dz du dein  
selbs nit vergessest/ noch deiner kinder  
vnd gesinde/ sondern bittest mit ernst  
das der liebe Vater/ so dich inn seines  
namens vnd ampts eere gesezt/ vnnnd  
dich auch will vater genennet vnnnd  
geeeret haben/ dir gnade vnnnd segen  
verleyhe/ dein weyß/ kind vnd gesind  
götlich vnd christlich zu regieren vnd  
erneren/ Gebe dir weyßheyt vñ kraft  
sie wol zu erziehen/ vnnnd inen ein gut  
hertz vnd willen deiner lere zu folgen  
vnd gehorsam zu sein. Denn Gottes  
gaben sind beyde kinder vñ jr gedey-  
en/ beyde wol geratten vnd gut bley-

Ben/ sunst wirdt ein hauf nit anders  
den ein Sewstal/ ja ein bußenschule/  
wie man sihet bey den gotlosen gro-  
ßen leuten.

## Das fünffte Gepot.

Du solt nit tödten. Hielerne ich erst-  
lich/ das Gott von mir will haben/  
Ich soll meinen nechsten lieben/ also/  
das ich jm kein layd soll thun an sei-  
nem leybe/ weder mit wortten noch  
mit werckē/ nit durch zorn/ vngedult/  
neyd/ haß/ oder eynige Bosheyt/ mich  
an jm rechen oder schaden thun/ sun-  
dern soll wissen/ das ich schuldig byn  
jm zuhelffen vnd rathen in allen sei-  
nen leybs nöten/ Dañ er hat mir mit  
disem gepot/ meines nechsten leyb zu  
bewaren Befolhen/ vnnd widerumb  
meinem nechsten Befolhen/ meinē leib



zu bewaren/ vñ wie Syrach spricht  
Er hat vnser yegklichem seinen nech-  
sten Befolhen.

Zum andern/dancke ich hie solcher  
vnaussprechlichen liebe /sorge vñnd  
trew gegen mir/das er ein solche gros-  
se starcke hut vñd maur vñß meinen  
leyß her gestellet hat/das alle mensch-  
en sollē schuldig sein/ mein zu schonen  
vñ mich zu behüten/Vñd widerumb  
ich auch gegen alle menschen / helt  
auch drüber/vñd wo es nit geschicht/  
hat er das schwert Befolhen zur straf-  
der ihenigen die es nit thun/sunst wo  
solch sein gepot vñnd stift nit were/  
solte der Teuffel ein solch mörden vñ-  
der vñs menschen anrichten/das kei-  
ner nit ein stund sicher lebē kñnd/ wie  
es denn geschicht/wenn Gott erzür-  
net/vñd die vñgehorsame vñnd vñ-  
danckbare welt strafft.

Zum dritten/ Beycht vnd klag ich  
hie über meine vñ der welt Bosheyt/  
dz wir nit allein so greulich vnd anck-  
bar sind/ für solche seine väterliche lie-  
be vñ forge für vns/ sondern das doch  
ja zumal schendlich ist/ das wir sol-  
liche gepot vnd lere nit können/ auch  
nit lernen wollen/ sondern verachten  
als gieng es vns nit an/ oder als het-  
ten wir nichts dauon/ geen dazu sich-  
er dahyn/ machen vns kein gewissen/  
das wir vnsern nechsten wider diß ge-  
pot so verachten/ verlassen/ ja versol-  
gen vnd verletzen/ oder auch im hertz-  
en wol tödten/ folgen vnserm zorn/  
grim vnd aller Bosheyt/ als theten  
wir recht vnd wol dran/ Fürwar hie  
ist klagens vnd schreyens zeyt/ vber  
vns böse Buben vnd blinde/ wilde/ vn-  
gütige leute/ die wir wie die grimi-  
gen thier vndereinander vns treten

stossen/ krazen/ reyssen/ beyssen vnnnd  
fressen/ vnd fürchten solch ernst gepot  
Gottes nichts 2c.

Zum vierdten / Bitte ich/ er wolt  
der liebe Vater/ vns solch sein heylich  
gepot lernen erkennen/ vnnnd helffen/  
das wir vns auch darnach halten  
vnd leben/ Behütte vns alle vnder  
einander für dem mörder/ der alles  
mördens vnd schadens meyster ist/  
vnd gebe seine reychen gnade/ das die  
leüte (vnd wir mit jnen) gegen einan-  
der freündlich/ sanfft/ güttig werden  
einander hertzlich vergeben/ vñ einer  
des andern feyl vñ gebrechē christlich  
vnd brüderlich trage / vnd also inn  
rechtem friede vnnnd eynigkeyt leben/  
wie diß gepot vns leret vnd fordert.

## Das sechste Gepot.

Du solt nit Lebrechen. Hie lerne ich



abermal / was Gott gedencet über  
mich / vñ was er von mir haben wil /  
nemlich / das ich soll keusch vnd züch-  
tig vñd messig leben / beyde mit ge-  
dancken / wortten vnd wercken / vñd  
einem yeglichen sein weyb / tochter /  
magt / vngeschendet soll lassen / sun-  
der helfen / retten / schützen / vñd alles  
thun / was zu erhaltung irer eeren  
vñd zucht dienet / auch helfen die vn-  
nützen meüer stopffen / so inn ire eere  
abschneyden oder stelen / Denn solchs  
alles bin ich schuldig / vñd Gott will  
von mir haben / das ich nit allein soll  
meines nechstes weyb vñd die seinen  
vngeschendt lassen / sunder auch schul-  
dig sein / das ich seine zucht vñd eere  
helffe erhalten vñd bewaren / wie ich  
wolt / das mein nechster gegen mir  
solchs thun muste / vñd diß gepot an  
mir vñd den meinen üben.

Zum andern/ danck ich dem trewen  
en lieben Vater/ für solche seine gnade  
vnd wolthat/ das er mit disem gepot  
inn seinen schutz vnd schirm nymbt/  
meinen man/sun/knecht/ weyb/toch-  
ter/ magt / Vnd verbeüt so ernstlich  
vñ hart/ das man sie nit zu schanden  
sol machen/denn er gibt mir sicher ge-  
leyt/ helt auch drüber/ vnnd lests nit  
vngestraftt/solt ers auch selber thun/  
wo yemand solch gepot vnd geleyt  
übertrit vnd bricht/ Es entlaufft jm  
keiner/ er muß es/ entweder hie beza-  
len/oder solche lust zu letzt im hellisch-  
en feuer büßen / Denn er will keusch-  
heyt haben/ vnd eebruch nit leyden/  
wie wirs denn täglich sehen in allen  
vnbusfertige/rauchlosen leuten/ das  
sie endtlich Gottes zorn ergreyfft vñ  
schendlich hyn richtet/ sunst were es  
nit möglich/ für dem vnsaubern teuf-

fel ein stund sein weyb/ kindt/ gesindt/  
bey zucht vnd eeren zu erhalten/ Es  
würden eytel hundts hochzeyt/ vnnnd  
viehisch wesen drauß/ wie es gehet/  
wo Gott im zorn sein handt abthut/  
vnd lests über vnd über gehen.

Zum dritten/ Beycht vnnnd bekenne  
ich mein sünd (vñ aller welt) wie ich  
wider diß gepot gesündigt hab/ es sey  
mit gedanken/ wortten vnd werck-  
en/ mein lestag/ vnd nit allein vndan-  
ckbar gewest/ für solche schöne lere  
vnnnd gabe/ sunder auch wol wider  
Gott gemurret habe/ das er solliche  
zucht vnd keüscheyt gepoten/ vnd nit  
allerley vnzucht vnd büßerey/ frey vñ  
vngestraftt gelassen hat/ den eestand  
veracht/ verspottet/ verdambt ge-  
halten zc. wie den dises gepots sünde für  
allen andern/ die gröbesten vnd aller  
erkentlichsten sind/ keinen deckel noch



schmücklein haben/das ist mir layd.

Zum vierdten/ Bitte ich für mich  
vnnnd alle welt/ das vns Gott wölle  
geben gnade/ solch sein gepot mit lust  
vñ liebe zu halten/ Das nit allein wir  
keüsch leben/sundern auch andern da  
zu helffen vnd rathen.

Also fare ich fort mit den andern  
gepoten/ so ich zeyt vnnnd weyl habe/  
oder mich gelust/ Denn wie ich ge-  
sagt habe/ will ich niemandt gebun-  
den/an dise meine wort oder gedanc-  
en/ sondern mein exempel dar gestel-  
let haben/ dem da folgen mag wer  
da will/oder bessern/wers kan/vnnnd  
auff ein mal für sich nemen alle gepot  
oder so vil in gelustet/ Denn die seele/  
wenn sie auff ein ding geredt/es sey  
böß oder gut/vnd jr ernst ist/so kan sie  
in einem augenblick mer dencken/den  
die zunge in zehen stunden reden/vnd

die federn in zehen tagen schreyben/so  
ein behend/ subtil vnd mechtig ding  
ists vmb die seel oder geyst/Darumb  
hat sie die Zehen gepot / durch alle  
vier stück/ gar bald außgericht/wen  
sie es thun will vnd ernst ist.

## Das siebend Gepot.

Du solt nit stelen. Erstlich lern ich  
hie/ich soll meines nechsten gütter nit  
nemen noch haben wider seinen wil-  
len/ weder heymlich noch offenbar/  
nit vntrew noch falsch sein/ mit han-  
deln/dienen/arbeyten/ damit ich das  
meine nit diebisch gewinne/ sondern  
soll mich im schweyß meiner nasen  
neeren/vñ mein eygen brot essen/ mit  
allen trewen. Item das ich helffen  
soll/das meinem nechsten (gleich wie  
mit selbs) das seine/durch obgenante

stück nit genommen werde.

Ich lerne auch/das Gott solch gepot/ mir mein gut Befridet vnd verheget/ auß väterlicher forge vñ ernst weyl er verbeüt/man solle mir nichts stelen/ vnd wo mans nit thut/ so hat er die straffe drauff gelegt/ den galgen vnd strick meyster Hansen besolhen/oder wo der nit kan/ so strafft er es doch selbst/ das sie müssen zu letzt Betler werden/wie man spricht/Wer jung gern stilet / der gehet im alter Betlen. Item vnrecht gut druhet nit/ Vnd übel gewonnen/böflich zerrunnen.

Zum andern/danck ich seiner trewe vnd güte/ das er mir vnd aller welt/ so gutte lere/ vnd damit auch schutz vnd schirm gegeben hat/denn wo er nit schützt/ bliebe keinem kein heller noch Bissen Brots im hause.

Zum dritten/ Beyehte ich alle mein  
sünd vnd vndanckbarkeyt/ wo ich ye-  
mand vnrecht vnd zu kurtz oder vn-  
trew gethan hab mein lebenlang &c.

Zum vierdten/ Bitte ich/ er wolt  
gnad verleyhen/ das ich vñ alle welt  
solch sein gepot/ doch lernen vñd be-  
dencken mügen/ vñ auch dauon bes-  
sern/ das doch des stelens/ raubens/  
schindens/vntrewens/vnrechts/we-  
niger werde/ vnd in kurtz durch den  
jüngsten tag ( da alle aller heyligen  
vnd creaturn gebet hyn dringet ) Ro.  
viii. gar ein ende werde/ Amen.

## Das acht Gepot.

Du solt nit falsch gezeügnuß geben.  
Das leret erstlich/ vns warhafftig  
vnder einander sein/ vnd allerley lü-  
gen vnd verleümbden meyden/ gern  
das beste



das beste von andern reden vnd hö-  
ren/ Vnd ist damit vnserm gerücht  
vnd vnschuld/ ein mawer vnd schutz  
gestifft/ wider böse meüler vñ falsche  
zungen/ welche auch Gott nit vnge-  
strafft leßt/ wie von andern gepoten  
gesagt. Des sollen wir jm dancken/  
beyde für die lere vñ schutz/ die er vns  
so gnedigklich hiemit gibt.

Vnd zum dritten / beychten vñnd  
gnade begeren/ das wir vnser lebtag/  
so vndanckbar vñ sündlich zubracht  
haben/ mit liegen/ falsche bösen meü-  
lern wider vnsern nechsten/ dem wir  
doch schuldig sind/ rettung aller sei-  
ner eere vnd vnschuld/ wie wirs selbs  
gern hetten.

Zum vierdten / bitten wir vñß  
hilff / solliche gepot hynsfürt zuhal-  
ten/ vnd vñß ein heylsame zunge zc.

D

## Das neündt vnd zehend Gepot.

Du solt nit Begeren deines nechsten  
hauß/Item seines weybs ic. Das le-  
ret vns erstlich/ wie wir mit keinem  
scheyn des rechten/vnsers nechste güt-  
ter vnd was sein ist/ im abspannen/  
abwenden/ abdringen sollen/sunder  
helffen das ers behalten müge/ wie  
wirs selbs gern wolten vns gesche-  
hen/Vnd ist auch ein schutz wider die  
spitzen sündlein vnd rencke der welt-  
weyssen/ die doch auch ire straff zu  
letzt kriegt.


Zum andern/ Sollen wir dafür  
dancken.

Zum dritten/ Unser sünde beych-  
ten mit reu vnd leyd.


Zum vierdten/ Bitten vmb hilff  
vnd sterck/frum zu werden/ vnd sol

lich Gottes gepot zu halten.

Das sind die Zehen gepot vierfel-  
tig gehandelt/ nemlich/ als ein Leer-  
büchlein/ als ein Sangbüchlein/ als  
ein Beychtbüchlein/ als ein Betbüch-  
lein. Hieraus solt ja ein hertz zu sich  
selbs kumen/ vñ warm werden zum  
gebet/ Aber sihe zu/ das du es nit alles  
oder zu vil für dich nimest/ damit der  
geyst nit müde werde/ Item ein gut  
gebet sol nit lang sein/ auch nit lang  
auffgezogen werden/ sunder oft vñ  
hitzig sein/ ist gnug wenn du ein stück  
oder ein halbes kanst kriegen/ daran  
du in deinem hertze ein feürlein kanst  
auff schlagen/ Nun das wirdt vñnd  
muß der geyst geben/ vñd weyter le-  
ren im hertzen/ weñ es also mit Got-  
tes wort gereymet vñd geledigt ist/  
vñ frembdē geschefften vñ gedancē.



Vom Glauben oder heyliger Ges-  
chrifft ist hie nit zu sagen/ denn das  
were ein vnendlich ding/ Wer hie ge-  
ußet ist/ kan hie wol einen tag die Ze-  
hen gepot/ den andern einen Psalm  
oder ein capitel auß der schrifft zu sol-  
lichen feurzeug nemen/ vnd in seinem  
hertzen damit feuer auffschlagen.



Almechtiger ewiger Got/ güt-  
tiger Vater / on welchen sunst  
kein ander Gott ist / den die  
menschen billich anrüssen/ Vnd der  
du mir auch gepoten vnd auffgelegt  
hast/ das ich dich anbeten/ bitten/ vñ  
in meiner angst vñ nott anrüssen sol/  
vñ durch solch gebet von mir geeeret  
wilt sein.

Auff solch gepot vnd befelch/ wie  
wol mit einem erschrocken vnd forcht-  
samen hertzen/ kum ich zu dir/ den ich





meinen ernstest Richter erkenne/ auß  
dem das ich ein armer sündler byn/ vñ  
in mutter leybe in sünden empfangen  
auch auß mutter leybe in sünden ge-  
boren.

Demnach so erkenn ich auch mein  
vngerechtigkeyt/ vnd meine sünd ste-  
hen mir alle augenblick für meinen  
augen/ vnd ist inn mir auch heütigs-  
tags nichts guttes/ sondern alles sün-  
de vnd böß/ was in vnd an mir ist/ vñ  
das auß mir gehet/ denn ich byn im  
todt vnd der finsternuß/ in thorheyt/  
in lügen/ in sünden vnd in bößheyt/ in  
schwacheyt/ in trawrigkeyt/ vñ in  
vnglauben/ in schanden/ in vnfrid vñ  
verzweyfflung/ in verdammuß/ vnd  
inn allem bösen/ hab auch die gröste  
sünd auff mir/ so ein mensch ymmer-  
mer gehabt kan vnd mag. Denn ich  
byn der rechte faule bawm/ vnd ha-

Ben mich die pforten des todts vñ der  
hellen vmbgeben/weyl ich deinen hey-  
ligen namen so offft geuneeret/nit al-  
lein vñ festiglichen an dich geglaubt  
auch die lieb gegen meinem nechsten  
nit gebraucht vñnd erzeyget hab, be-  
sunder auff mich vñnd mein aygen  
nutz gesehen vñ getracht/auch allem  
übel nach gestelt/vnd byn dir vñ dei-  
nem heyligen wort vñdancckbar ge-  
west/Welchs alles von grund meins  
hertzen/mir ein treulichs laid ist/vnd  
auff solchem allem/meiner seelen inn  
verzweyfflung stehe.

Weyl ich aber weyß/das dein lie-  
ber sun Jesus Christus/darumb mir  
von dir herab gegeben ist/darumb  
auch mensch worden/gelitten/gestor-  
ben/in die helle gefaren/vnd am drit-  
ter tag wider auffstanden/sitzend  
zu der gerechten des hymnlichen Vaters

ters/ auff das er mich erlöfte / Vnd  
zu der zeyt da er lyd / alle meine sünd  
als ob sie warhafftig sein eygen ge=  
wesen/ In welchem doch nie kein sün=  
de was/ an sich genummen hat / auch  
warlich für sie gelitten/ vnd inn rech=  
ter hellischer not gesteckt/ mich nun  
von der maledeyung des gesetzes er=  
löst/ vnnnd er ein vermaledeyung für  
mich worden ist/ auch mir endlich sei=  
ne seligkeyt/ heyligkeyt vnd gotheyt/  
auf lauter Barmhertzigkeyt / on all  
mein zuthun/ gnedigklich vnd Barm=  
hertzigklich geschanckt.

Nach dem du mir dann auch ge=  
poten hast/ das ich in dich allein glau=  
ben/ dich eeren/ auch in aller not an=  
ruffen/ bitten vnd anbeten sol/ mit zu=  
sagung/ das du mich auch des/ was  
ich dich bitten werd/ geweren wölst/  
welche zusagung denn mir der. 50.

Psalm anzeigen thut/ also sprechend/  
Küss mich an zur zeyt der not/ so wil  
ich dich erretten/ so soltu mich preys-  
sen/ Vnd Christus im Euangelio  
Matthei am. 7. Bittet so wird euch  
gegeben/ denn ein yeglicher wer da  
bittet der entpfehet/ Klopffet an so  
wird euch auffgethan/ Item Joha.  
am. 16. Was jr den Vater in meinem  
namen bitten werdet/ das wirdt er  
euch geben.

Auff solch gepot vnnnd zusagung  
setz ich allen meinen trost vnd glau-  
ben/zweyffel auch das gar wenigste  
nit daran/ wirdt keck vnd tret zu dir  
**Vater vnser der du bist im**  
**hymel** getrost/ vnd bitte dich/ nit  
auff meinē fürnemen/ noch auff mein  
aygene würdigkeyt/ besondern auff  
dein gepot vnd verheyssung/ so mir  
nit selen noch liegen kan/ Vergiß mir



alle meine sünd/vnnd mach/ das sie  
mir noch vil leyder werden.

Mach auch einen neuen menschs  
en auß mir/auff das ich allen sünden  
seyndt werd/den alten Adam in mir  
dempffe/alle deine gepot/dein götlich  
es wort vnd weyßheyt liebe/ menschs  
lichen lüsten widerstehe/ niemands  
vnrecht thu/noch zuthun begere.

Vnd weyl meine vnderfassen/nit  
mein/sunder dein allein seind/vnd ich  
nur ein dienerin über sie gesetzt byn/  
so verleyhe mir dein götliche weyß  
heyt/auff das ich sie regiere nach dei  
nem Befelch vnd wolgefelligem wil  
len/Auch nit meinen nutz/rhüm vnd  
eere allein/Besunder einen gemeinen  
nutz suche.

Nich auch meines gewalts vnd  
hohen standts nit überhebe/sunder  
das ich für augen hab/vnd betrachte

alle augenblick/ mein elende vnd sündige entpfengnuß vn̄ geburt/ Vnd ob ich wol in grossem stande/dz ich doch nichts mer sey/ allein wie ein ander arm mensch/ Auch also auff die erdē kumen/ die vns alle gleich tregt/ vnd wie ich inn der gemein einen eingang in dise welt vnd elend gehabt/das ich auch widerumb einen gleichen außgang haben werde.

Herwiderumb verleyhe meinen vnderlassen vnn̄ dienst verpflichten dienern/ein vertraut/ kindtlichs/vnderthenigs/dienstlichs vnd demütiglichs gemütte/ damit sie sich widerumb alles billigen gehorsams gegen mir/ meinem lieben Herren vnd kindern erzeygen/vnd verstehen mügen/was sie vns thun/das nit vns/besunder dir vnserm hymlichē Vater/des verwalter wir allein sind/ erzeygen/

Beweysen vnnnd wolgefallens daran  
thun/ Durch welchs alles **Sehey**  
**liget** werd dein name auch  
gelobt vnnnd gepreyst/ Welcher auch  
durch mich/meinen herrn/kinder/vñ  
alle vnderthan / mit wortten aber  
wercken nymmer geunheyliget werd.

Das geb mir/meinem lieben her-  
ren/kindern vnd vnderthanen/ auch  
allem menschlichen geschlechte dein  
heyligs wort/ das das Euangelium  
rechtgeschaffen durch die welt gepre-  
digt werde/ vnd durch den glauben  
angenummen/ in vns wircke vnd lebe/  
auch von vns nit hynweg genummen  
werde / aber entzogen/ sunder gutte  
frucht vñ besserung gebere/vñ durch  
die krafft des heyligen geystes / Das  
also **Zukumme** dein reych vnd  
gehe vnder vns/ vnnnd des Teuffels

reych nidergelegt werde / das er kein  
reych oder gewalt vber vns habe / so  
lang bis es endlich zerstört / die sünde /  
todt vnd helle / auch vertilget werde /  
das wir ewigklich leben in voller ge-  
rechtigkeyt vnd seligkeyt.

O allmechtiger gerechter Gott /  
heyliger Vater / weyl daß dein wort  
vnd zusage gewis / vnd du mir / mei-  
nem lieben Herren / kindern / landen  
vnd leuten / dein heyligs wort / durch  
warhaffte verkündung desselbigen /  
gnediglichen geschanckt / vnd durch  
deinen heyligē geyst / vns deinen glau-  
ben eingepflanzt / des ich dir auß  
grund meines hertzens / die höchste  
vnd vnsterbliche dancksagung thu /  
kindlich bittende / das du mich vnd  
die meinen / auch bis ans endt behal-  
ten wölst.

So byn ich doch gewis / vñ weyß



17  
mich durch dein götlich wort zu erin-  
nern/das dein heyligs Creütz/durch  
verfolgung hie auff erden/nit allein  
vom Teuffel/besunder auch der gan-  
zen welt/Bevor inn vnsern letzten zü-  
gē/durch gewaltige anfechtung des  
Teuffels vnd fleyschs volgen wirdt  
wie du mir dann solchs im Euange-  
lio anzeygen thust / das ein yeder so  
sich dein jünger bekent/sein creütz auf  
sich nemen soll vnd dir nachfolgen/  
Weyl dann auch der jüngling vnnnd  
schüler / über den meyster nicht sein  
wirdt/ so erkenn ich mein schwachs/  
zweyffelhaftigs/sündigs fleysch/dz  
es on dein götliche gnade gar nichts  
kan vnd vermag.

Getröst mich aber auffss höchste/  
deiner götlichen gnaden/auf welch-  
er du mich in meiner mutter leyß ge-  
schaffen/vñ ein gestalt gemacht hast/

vnd zur solchen zeyt darnach Balde/  
auff das ich het dauon ich also von  
dir gemacht/ leben möcht/ vnd erne-  
ret wurd/hastu meiner mutter Brüst  
mit milch erfüllt/vñ hast mich in jrer  
schos wunderbarlicherhalten/vñ da  
ich noch meiner mutter Brust narung  
holet/ ganz väterlich vñnd gnedig-  
lich erzogen/ auch wie elendich ge-  
west/zu einem solchen menschen wie  
ich byn gemacht/ vnd auß vilen fer-  
ligkeyten/ trüßsal/ angst/ not / mühe  
vnd arbeyt/ nit allein geschützt/vñnd  
geschirret / besunder auch endlichen  
erhalten/erlöst/ vnd so sere auff mich  
gesorget.

Derhalb / wiewol ich weyß wie  
abgötterisch ich geboren/ inn sünden  
entpfangen vnd erwachsen byn/ ye-  
doch mich billich rühme/das du mein  
Gott bist/vō meiner mutter leyß an/

Auff welchen ich/ auß deiner allein  
lauter gnaden vnd Barmhertzigkeyt/  
on all mein zuthun/ gleich geworffen  
Syn/ Dañ du hast grosse ding an mir  
gethan/ der du mechtig bist/ vnd des  
name heylig ist/ Welchs Barmhertzig  
keyt auch wehret ymmer für vñ für/  
Bey denen die dich fürchten/ Denn du  
hast gewalt geübet mit deinem arm/  
vnd zerstreuet die da hoffertig seind  
in jres hertzē syn/ Du hast die gewal-  
tigen von dem stul gestossen/ vnd die  
nidrigen erhaben/ Die hungrige ha-  
stu mit güttern erfüllet/ vñ die reych-  
en lehr gelassen/ Du hast der Barm-  
hertzigkeyt gedacht/ vnd deinen kin-  
dern Israel auffgeholffen/ Wie du  
geredt hast vnsern vātern/ Abrahā  
vnd seinem samen ewigklich/ Dar-  
umb mein seele dich Herr erheben  
thut/ vnd mein geyst erfrewet sich in

dir got meinē heyland/ Der du mein  
nüdriḡkeyt vnd sündhaffstige natur  
angesehen hast / Darumb du denn  
mein höchste zuuersicht bist/welchem  
ich mich auch ganz vnd gar ergebe/  
vnd Befelhe.

Derhalben auch all mein anligen  
vnd sorge werff ich auff dich meinen  
Herrn/vnd Bitt/ das du mich ewig-  
lich weyter versorgen wöllest/vñ nit  
in vnfride lassen/ denn du sorgest für  
mich auch/wie arm vñ elend ich byn/  
so denckestu für mich/ Bist mein helf-  
fer vnd erretter/ Vnd ob mich vatter  
mutter /ja alle meine freünde vnd die  
gantz welt verlassen wirdt/ich auch  
von menigklich veracht/Bitt ich/ das  
du Herr yetzund/auch vor vnd nach/  
mich wöllest auffnemen/ Denn dies  
weyl deine werck wunderbarlich  
seind/ dir auch nichts verporgen ge-  
west



west/ehe ich gemacht ward/vnd al-  
les noch wissend/was in mir noch be-  
schehen soll/vnd du mein nieren inn  
geroalt hast/auch mein fleisch die an-  
fechtung der not des todts bereyt fü-  
len thut/vnd die angst/so ich an das  
sterben gedencke/bereyt verhanden/  
zubeforgen/das sie sich in letzten zügen  
noch mer vnd grösser machen vnn-  
meren wird.

So bitt ich dich mein lieber Herr/  
güttiger Vater/mach dich nit ferne  
von mir/sterck/tröst/vnd durch dei-  
nen heyligen geyst enthalt mich/dañ  
es ist an dich kein helffer/damit ich  
auch deinen grossen namen erzelen  
müg meinen Brüdern/Vnd dich/der  
du nit verachtet hast das elend mei-  
ner armut/vnd dein angesicht nit vō  
mir birgest/dardurch ich dich in der  
gemein rhümen müge/das du mich

elenden/der ich schreye/erhörest.

Bitt ich dich lieber Herr heyliger  
Vater/ **Dein** will beschehe  
wie im hymel also auch hie  
**auffer den** vnd nit des Teuffels/  
vnd vnser feyndt willen/noch alles  
des/ so dein heyligs wort verfolgen/  
vnd dempffen will/ oder dein reich  
hyndern/Vnd gib vns/das wir alles  
wz darüber zu leyden ist/ mit gedult  
tragen vnd vberwinden/ auff das  
vnser armes fleysch auß schwacheyt  
oder tragheyt nit wancke oder ab-  
falle / Besunder mein wille gantzlich  
vnd gar/in vnd durch deinen willen  
gedempfft werde/vnd ich mir deinen  
willen wolgefallen lasse.

Auch lieber göttiger Vater/ weyl  
du mich hast heysen bitten vmb das  
tegliche Brod/welchs nit allein ist das

brod vnd korn/ so ich teglich leyblich  
essen vnd backen laß/ besunder wölst  
auch gebetten sein in gemein vmb al-  
les/ so sollichem anhengig ist / Bevor  
aber vmb das brod der seelen.

So bitt ich dich starcker/ rathsam-  
mer vnd warhafftiger Gott/ **Un-**  
**ser** teglich brod gib vns lie-  
ber **Herr** heüte/ vnd erstlich  
das speyß brod der seelen/ dein selbst  
heylsames götlichs wort/ solchs auch  
vns nicht entziehen wölst / besunder  
durch deinen starcken rath/ heüßficht  
vnnnd wolschefflich wachssen lassen/  
Gutte Prediger / frumē christliche  
Prelaten vñ herrn/ die solchs frucht-  
barlich/ lauter/ reyn vnd klar/ on al-  
len falschen zusatz vnnnd menschliche  
verdunkelung / auch mit eintracht  
des heyligen geysts/ sehen mögen/ vñ

selbst lieben. Sunderlich auch vn-  
sern Keyser/alle Könige vnd Kön-  
gin/ Fürsten/ Herren/ Oberherren/  
Regierer vñ Communen/ auch mei-  
ne Brüder vnd Schwester/ Beuor aber  
auch vnser Könige/ Königin/ vñnd  
jungen herrschafften/ wölst mit der  
seelen speyse/ deinem heyligen wort er-  
leuchten/ auch sollichen allen vnd mir  
meinem lieben herren vñnd kindern/  
Nachmals vnsern nach vns veror-  
denten rethen/ auch der ganzen chri-  
stenheyt/ dein götliche weyßheyt mit-  
teylen/auff das sie vnd wir alle/ frid-  
lichen regieren/ vnd in fride geregiert  
mögen werden/damit wider Türck-  
en vnd Tattern/vnd alle feynde des  
Christlichen namens vnd worttes zu  
siegen.

Den vnderthanen vnd gemeinen  
hauffen/ verleyhe gehorsam/ frid vñ



eintracht / gegen iren herrschafften/  
auch vnder einander selbst fridsam  
vnd eintrechtig zu leben/ Vnd wölst  
vns allen nachmals weyter verley-  
hen vnd geben das leybliche Brodes-  
sen vnd trincken/ kleyder/ hauf/ hoff  
vñ gesunden leyb/ darzu das gettrayd  
im velde/ vnd die frucht wol wach-  
sen vnd einbringen lassen.

Fürbaß daheim wol haushal-  
ten helffen/ ein frummen herrn/ kinder  
vnd gesynde geben vnd erhalten/ vnd  
vns er handarbeyt / auch rathschla-  
gen vnd regiment/ vñ alles was wir  
zuthun haben/ gedeyen vnd wol ge-  
raten lassen/ Trewe nachpawren vñ  
gutte freünde bescheren/ auch sie vnd  
vns alle behüten vor allerley schaden  
der seelen/ leybs vnnd narung/ Auch  
für vngewitter/ hagel/ feuer/ wasser/  
giffte/ pestilenz/ viehe sterben / krieg

vnnnd Blutuergiessen / theurer zeyt/  
jchedlichen thieren/ vnnnd allen bösen  
fellen vnd leuten/ **Vnd verlasse**  
**vns vnser schuld / als wir**  
**verlassen vnnsern schuldi-**  
**gern/** Den mein lieber Vater / wie-  
wol ich weyß / das du lang vor mei-  
nem bitten / mir meine sünd vergeben  
hast / Vnd auß dem / das du mir das  
Euangelium / welliches eytel verge-  
bung der sünden ist / gnediglich ge-  
schanckt / ehe ich darumb gebeten /  
oder yemals darnach gesunnen hab /  
welche vergabung ich den gantz wol  
erkenne / sage dir auch den höchsten  
danck.

Weyl ich aber weyß / mein / als ei-  
nes menschen straucheln / vñ teglichs  
fallen / vnd das sich mein fleysch ym-  
merdar vnd stettigs reget / mit bösen

lüssen vnd tücken/ derhalben ich teg-  
lich mit wortten vnd wercken/ thun  
vnd lassen/ sündige / dadurch denn  
mein gewissen zu vnfride kumbt/ dar-  
umb ich mich für deinem zorn fürcht/  
Weyl mir dan vnmöglich ist/on dein  
gnad vnd teglichs vergeben/auch on  
dein hilff/den sünden abzustehen.

So bitt ich dich lieber Herr/ gne-  
diger Vater/wölst mir einpflanzen/  
das ich deiner vergebung nimmer  
mer vergesse/ sunder mich stett vnd  
fest daran erhalte/Vnd wölst nit an-  
sehen mein sünde/ vnd mir fürhalten  
was ich teglichs verdiene/sunder mit  
gnaden gegen mir handeln/ vnd ver-  
geben/ wie du denn verheysen hast/  
vnd also ein fröliches/vnuerzagtes  
gewissen verleyhen/ für dir zustehen  
vnd zu bitten.

Das du mir auch deinen geyst der

weyßheyt mittheylen wölßt/ damit ich  
hie nit wider mich selbst Bitte/ weyl  
du mir vergebung zugesagt/ so ferne  
ich meinem nechsten auch vergeben  
würdt/ vnd aber meinem bösen fleisch  
dem nechsten zuuergeben/ on deine  
gnade auch vnmöglich.

Bitt ich dich/ das du mir durch  
deinen geyst der weyßheyt/ verleyhen  
wölßt/ das ich willigklich vnd gerne/  
nit allein meinem nechsten/ alles was  
sie wider mich handeln vnd thun/  
vergebe/ sunder auch jnen diene/ vnd  
alles gutte für das böse erstatte/ auff  
das dein name gepreyßt/ vñ die höch=  
ste erkantnuß zu deiner eere beschehe.

Ach heyliger Vater/ dir ist wiß=  
send/ mit was maß inn disem jamer=  
thal/ vmb vnser leben gethan ist/ also  
ob wir heüte stehen/ morgen wider  
darvon fallen/ durch vilfeltige ver=



suchung yetzunder des fleyschs / inn  
welchem wir wonen / vnd den alten  
Adam tragen / der sich regt / vnd vns  
teglich reytzet zur faulheyt / fressen /  
sauffen / geytz vnnnd deuscherey / den  
nechsten zu triegen vnd zu übersetzen /  
Vnd inn summa / allerley bösen lüsten  
anzuhangen / so vns von natur an-  
fleben / zum teyl auch durch ander  
leüte / gesellschaft vnd exempel / in se-  
hen vnd hören gereytzt werden.

Nachmals der welt / die vns mit  
worten vnd wercken beleydigt / dar-  
durch sie mich treybe zu zorn vnd vn-  
gedult / inn welcher auch nichts an-  
ders ist / denn haß vnd neyd / feindt-  
schafft / gewalt vñ vnrecht / vntrew /  
rechen / fluchen / schelten vnd affter-  
reden / hoffart vñ stoltz / mit überflüs-  
sigem schmuck / eere vnd rhum.

Zum letzten aber volget die höchst

versuchung des Teuffels / welcher  
vns herzet / vnd allenthalben zublest /  
vñ vnser gewissen treybt / wie er vns  
einfüren möcht / das wir beyde / Got-  
tes werck vnd wort in windt schlü-  
gen vnd verachten / auff das er vns  
vom glauben / hoffnung vnd der lieb  
reyße / vñ vns bringe zu mißglauben /  
falscher vermessenheyt vnd verstock-  
ung / auch zur verzweiflung / Gottes  
verlaugnen vnd lesterung / welchen  
anfechtungen allen / wir arme men-  
schen on dein gnad zu widerstehen  
vnmüglich / Weyl wir aber in disem  
elenden jamerthal / on eynicherley an-  
fechtung nit sein können.

So bitt ich dich lieber Vater /  
durch deiner zusage willen vnd ver-  
heyßung willen / **Nicht einfüre**  
**vns in versuchung** / auff dz  
ich nit durch solche zurück vnd hyn-

neyn fallen/ darinn versincken/ auch  
in solche nit bewilligen vnder auffse/  
sunder lieber Vater/ weyl der höchste  
Priester / heylandt vnd sündtrager  
Jesus Christus dein lieber sun/ selbst  
für vns/ wie Johannis am. xj. gnug=  
sam vermeldt/ das du mich bewaren  
wölst für dem übel/ gebetten/ vñ das  
du vns inn deiner warheyt heyligen  
wölst/ vnd ausdrückt/ das dein wort  
vnd zusag/ die warheyt sey/ auch sich  
selbst/ auff das wir inn der warheyt  
geheyliget werden/ geheyliget hat.

Weyl dan dein wort die warheyt  
vnd du haben wilst/ das wir dich on  
vnderlaß vnd auff hören bitten sollen  
mit warhaffter zusag/ woz wir vmb  
deines lieben suns willen bitten wer=  
den/ das wir gewert vnd erhört sol=  
len sein/ auch vns darumb deinen lie=  
ben sun herab geschickt/ leyden/ ster=

Ben vnd aufferstehen lassen/auff das  
wir in dem glauben an inen/ auch vō  
den sünden ersterben/vnnd endtlich  
aufferstehen werden.

So bitt ich dich vmb Christi dei-  
nes lieben suns willen/ vnd vmb das  
theure blütuergiessen/leyden sterben/  
vnd aufferstehung vnser heylands/  
das du mir kein versuchung schaden  
wölst lassen/ **Sunder erlöse**  
**vns von dem vbel/** auff das  
ich des vnglücks alles loß werde/  
**Amen.**

Vnd sunderlich O Herr Gott va-  
ter im hymel/ O Herr Gott sun der  
welt heylandt/ O Herr Gott heyli-  
ger geyst/wölst vns gnedig sein/helf-  
fen vnd vnser verschonen.

Auch lieber Herr Gott/wölst vns  
für allen sünden/für allem yr fall/für



allem übel/ für des Teuffels trug vñ  
list/ vor bösem schnellen todt/ vor Pe-  
stilentz vnd theurer zeyt/ vor krieg vñ  
Blütuergiessen/ für auffrür vnd zwi-  
tracht / vor hagel vnd vngewitter/  
vor dem ewigen todt Behütten/ Vnd  
durch dein heylige geburt/ durch dein  
todtkampff vñnd Blütigen schweyß/  
durch dein creütz vñ todt/ durch dein  
heylige aufferstehung/ inn vnser letz-  
ten stund/ Hilff vns lieber Herr Got.

Ach hymlicher Vater/ dz du dei-  
ne heylige Christliche kirche regieren  
wölst/ leyten vñnd führen/ Auch alle  
Bischoff/ Pfarherr vnd kirchen die-  
ner im heylsamen wort vñ heyligem  
leben behalten/ Allen rotten vnd er-  
gernussen weren/ Alle yrrigen vñnd  
verfürten widerbringen/ Den Sa-  
than vnder vnser füsse treten/ Treu  
arbeyter in dein erndte senden/ Dei-

nen geyst vñ krafft zum wort geben/  
Allen Betrüben vnd Blöden helfen  
vnd trösten.

Allen Königen vnd Fürsten frid  
vñ eintracht geben / Vnserm Keyser  
steten sieg wider die seynd der Chri-  
stenheyt ginnen / Meinen lieben ge-  
mahel / mich meine kinder / auch alle  
diser land Amptleut vñ regierer / ley-  
ten / schützen / vnd dein heylige weyß-  
heyt mittheilen / Auch die gemein di-  
ses ganzen landes segenen vñ Behüt-  
ten.


Allen so in nott vnd fahr sind mit  
hilff erscheynen / Allen schwangern  
vnd seügerin fröliche frucht vnd ge-  
deyhen geben / Aller kinder vñ fran-  
cken pflegen vnd warten / Alle ver-  
druckte gefangene laß vnd ledig laß-  
sen / Alle witwen vnd wayßen vertey-  
digen vnd versorgen / Aller menschen

dich erbarmen.

Vnsern feinden/verfolgen vnd lesterern vergeben vnd sie bekeren/ Die frucht auff dem landt geben vnd bewaren/ Vnd vns gnediglich erhören/ O Jesu Christ Gottes sun/ Erhör mich lieber Herre Gott/ O du Gottes lamb/ welchs der welt sünde tregt/ Erbarm dich über mich/vnnd verleyhe vns deine stetten frid/ Amē.

O Herre handel nit mit vns nach vnsern sünden/ Vnd vergelte vns nit nach vnser missethat/ Denn wir haben gesündigt mit vnsern vātern/vñ haben mißhandelt vnnd sind gotlos gewesen.

## Lazt vns betten.

 Herr allmechtiger Got/der du der elenden seuffzen nicht ver



schmehest/vnd der Betrübten hertzen  
verlangen nit verachtest/Sihe doch  
an mein gebete/welchs ich in meiner  
not fürbringe/vnd erhöere mich gne-  
diglich/das alles so beyde vom Teuf-  
fel vnd menschen wider mich strebet/  
zu nichte/vnd nach dem rath deiner  
gütte zutrennet werde/auff das ich  
von aller ansechtung vnuerferet/dir  
in deiner gemeine dancke/vñ dich all-  
zeyt löbe.

O Herr Gott hymnlischer Vater/  
der du nit lust hast an der armen sün-  
der todt/lebst sie auch nit gerne ver-  
derben/sunder wilst das sie bekeret  
werden vnnd leben/Wir bitten dich  
hertzlich/du wöllest die woluerdien-  
te straffe vnserer sünden gnediglich  
abwenden/vnd vns hynfort zu Bes-  
sern/deine Barmhertzigkeyt mildig-  
lich verleyhen.

O Herr



O Herr Got himlischer vater / du  
weyßest / das wir so in mancher gros  
ser fahr / vor menschlicher schwach  
heyt nit bestehen mügē bleyben / Ver  
leyhe vnns beyde an leyß vnnnd seele  
krafft / das wir alles / so vns vmb vn  
ser sünden willen quelet / durch deine  
hilffe überwinden.


Allmechtiger ewiger Gott / der  
du durch deinen heyligen geyst / die  
gantz Christenheyt heyligest vnnnd  
regierest / Erhöre vnser gebet / vnnnd  
gib gnedigklich / das sie mit allen iren  
gelidern / in reynem glauben / durch  
deine gnade dir diene / Vmb

Jesus Christus deines  
suns / vnser Herr  
ren willen /  
Amen.

\*

f

Ein gar leer hübsche be-  
trachtung von der Treueinigkeyt/  
so der mensch am morgen auff-  
stehet.

 ewiger lieblicher glantz/ du  
aller reynester spiegel der chri-  
stlichen anschawung / O du  
aller durchleütteste stym/ Erleuchte  
mich heüt vnd alle stund/ mit deiner  
götlichen gnaden/ denn ich weys/ das  
vō dir ist kumen alle seligkeyt/ barm-  
hertzigkeyt vnd gutheyt/ heyligkeyt/  
gützigkeyt vnd miltigkeyt/ O du al-  
ler vnergründeste weysheyt/ du aller  
heyligste mayestet des götliche raths  
vnd Treueynigkeyt / Ich arme dein  
vnuerdiente bildnuß vnnd sündliche  
creatur / sage dir grof loß vnd danc/  
das du mich vnwirdige die verfallen  
sünderin/ dise nacht bewaret hast für

dem bösen feyndt/ Ich Bitte dich du  
wöllest heüt disen tag/mein leben vñ  
arbeyt also wenden vñ richten/nach  
deinem wolgefallen/das ich den gan-  
zen tag nichts anders thu vñ schaff/  
denn das dir angenehme sey/damit ich  
in meiner arbeyt/deiner grossen liebe/  
die du zu vns hast gehabt/vnd ich in  
meiner arbeyt dester duldiger werde  
In meiner anfechtung des fleysches  
vnd der zeytlichen gütter/damit ich  
arme sünderin ganz vmbfangen bin  
das du mein hertz wöllest also rich-  
ten/das ich disen tag vnd alle stundt/  
deiner gutheyt nymmer mer verges-  
se/vñ ich mein vertrauen/gantz setze  
in deinen willen/damit ich disen tag  
nichts wircke/nach wircken müge/  
den das deinem götlichen willen/an-  
genem vñ wolgefellig sey/Das helffe  
mir die heylig Treyeinigkeyt/Amen.



**Ein bekantnuß vnd gebet**  
so ein mensch zu Beth will geen/ der  
sprech also zu Christo.


**O** Herr Jesu Christe/ ich bekenne  
mich schuldig/ das ich disen tag  
layder nit zu deinem loß vnnnd eeren  
verbracht hab/ Byn dir nit danckbar  
gewest/ hab deinen todt vnnnd bitter  
marter/ nit recht zu hertzen gefasset/  
Ach mein gnediger Herr/ die 11. vnd  
dise 11. greüliche sünd/ hab ich heüt  
wider deinen götlichen willen gethan  
das vnd das hab ich versaumbt vnd  
nit außgericht/ hab mich nichts ge-  
bessert / O du frum̃er güttiger heyl-  
macher/ verzeyhe es mir/ durch dein  
theuer adelichs Blütuergiessen / Be-  
war mich auch yetzund dise nacht/  
für allen sünden vnd gefערligkeyten/  
laß mein hertz in dir rühen vñ wach-



en/dich zu loben/Ich Befelhe dir heüt  
vnd allzeyt/leyß/seel/geyst/eere/gut  
vnd handel/vnd schaff mit mir nach  
deinem wolgefallen/Gib mir gedult  
vnd gnade/so es wider meinen ver-  
keren willen gehet/damit ich diß le-  
ben einen jamerthal erkenne/vnd nur  
müße seüßzen nach vnserm seligen  
vaterlandt/den todt frölich begern/  
das ich dich im ewigen leben/mit al-  
len auferwelten/müße biß an das  
ende loben vnnnd glorificiren/Amen.  
Das wöllestu gnediger Gott vnnnd  
Vater mir verleyhen/durch das hey-  
lige verdienst des leydens Jesu Chri-  
sti/Amen.

## Am vierdten buch Mosi


spricht Gott/Also solt jr sagen  
zu den kindern Israhel/wenn  
jr sie segnet.



Der Herr segne dich vnd Behüte  
dich / Der Herr erleuchte sein ange-  
sicht vber dich / vnnnd sey dir gnedig /  
Der Herr hebe sein angesicht auff  
dich / vnd gebe dir frid / Amen.

So man das hochwirdig  
Sacrament des leybs vnnnd bluts  
Christi auffheben will / so er-  
hebt ewer hertz gegem hy-  
mel / vnd spricht diß  
nachfolgend  
gebet.

**H**err Jesu Christe / der du de-  
inen leyß für mich arme sünd-  
er / am creutz in den todt gegeben / vñ  
dein Blut zur verzeyhung meiner sün-  
de vergossen / vnd beyde / dein leyß vñ  
Blut / in deinem heyligē letzten abent-  
mal / zum gedechtnuß solcher grossen




wolthat eingesezt / vnd zur speyse vñ  
trancck gelassen hast / Verleyhe mir  
armen sünderin / das ich der frucht  
vnd krafft deines vnschuldigen Bit-  
tern todes / vnd theuren Blütuergies-  
sens / nymmer mer vergesse vñnd be-  
raubt werde / Vnd das mein gantz  
leben / hynfürder eytel dancksagung /  
gegen solcher grossen lieb vñnd wol-  
that / befunden werde / Amen.

**Ein Christliche vorbetrach-**  
tung vnd bekantnuß in Gott / so  
man will betten das heylige  
Vater vnser.

**E**wiger Gott / ich weys vñ be-  
kenne / das ich ein armer grosser  
sünder byn / ich mercke vnd empfinde  
in mir nichts denn begird / lust vñnd  
liebe zu zeytlichem gut / eere vnd wol-

**F iiii**





lust diser welt/zuneygung zu bosheit  
vnd zu allem argen/kein lust/Begird  
noch lieb zu tugent oder gerechtigkeit  
So ist mein hertz wild/vñ die gantz  
natur durch die erste sünd in meiner  
entpfengēnuss in mutter leyb vergifft  
vnd von meinen eltern auff mich ge-  
erbet/das ich von mir selbst/kein gut-  
ten gedanken anheben/vil weniger  
verbringē/ noch kein gut werck thun  
kan/so krank/so dürfftig/so elend/so  
verwundt byn ich/ ja halb todt/das  
auch das gute werck das ich thu/  
mir nit gut ist/sunder schedlich vñnd  
verdamllich/du wöltest denn allein  
auf deiner milten lautern barmhertz-  
igkeyt/gar vmb sunst/on all mein  
verdienst/zu gnaden annemen/denn  
es ist kein werck gut/das du nit gut  
machst/Es ist kein mēsch frum noch  
gerecht/denn der/den du frum vñnd




gerecht machst/ Du bist allein frum̃  
gerecht vnd heylig/ on alle sünd/vol-  
ler gnaden vñ aller tugend/empfan-  
gen vnd geboren/ Wir sind aller sünd  
vnd bosheyt vol/ auch hat niemand  
kein tugend noch gerechtigkeit/ denn  
der/ dem du dein heyligkeit/ dein ge-  
rechtigkeit gibest vñnd mitteylest/  
Darumb kumb ich zu dir mein erlö-  
ser/ vnd falle nider auff meine knye/  
rüsse/ schrey vnd demütiglichen bit-  
te/ dein götliche gnad/hilff vnd bey-  
stand/ den ich weyß wol/ das du dar-  
umb bist mensch in die welt geboren/  
das ich widerumb auß Gott geboren  
vnd ein sun Gottes würde/ darumb  
mustu mir mein sünd nemen/ vñ dein  
gerechtigkeit mir geben/ du bist allein  
darumb frantz vñnd schwach/ ein  
schecher vnd ein sündler/ ein narr vnd  
thor geacht worden/ das ich gesund/

gewältig/ heylig/ klug vñnd gerecht  
würde/ vñd zu letzt für mich gestor-  
ben/auff das ich ewigklich lebte/ Des  
tröste ich mich/darein setz ich all mei-  
ne hoffnung vñd höchsten vertrau-  
en/denn deine gerechtigkeyt ist mein/  
dein tugent ist mein/ dein heyligkeyt  
ist mein/ dein stercke vñd gewalt ist  
mein/vñd alle mein sünde seind dein/  
in der hoffnung/in dem trost vñ ver-  
trauen tret ich zu dir/darinn wil ich  
leben/darinn will ich sterben/es gehe  
mir wie es wölle.

Darumb bitt ich dich mein edler  
Gott/gib mir dein gnad/das ich dich  
lieb gewinne / vñd nichts denn dich/  
dein tugent vñ gerechtigkeyt begere/  
vñd darnach ein hertzlich verlangen  
hab/Als denn werd ich auß art/ vñd  
von natur der lieb/ meinem alten le-  
ben vñd der sünden/seyndt vñ heßig

werden/ rew vnnnd leyd darüber ge-  
winnen/ vnnnd mich fürder für allen  
sünden Behütten / Gib mir auch die  
gnad/ das ich dein heyligs leyden/ vñ  
dein bittern todt also gedenck/ das ich  
in mir empfind vnd mercke/ das alle  
böse lust vnd begird vberwinde/ vñ  
jn also widerstehe/ das sie mich nit ge-  
fangen nemen/ noch in mir gewaltig-  
klich regieren. Hilff mir ewiger Got  
das ich alle widerwertigkeyt / peyn  
vnd schmerzen/ armut vnd franck-  
heyt/ schand oder vneer/ auch den tod  
willigklichen vnnnd gedultigklichen  
vmb deinet willen leyden müge/ vnd  
nicht allein gedultigklich/ sonder mit  
freüden/ vnd alles wie es mir vnder  
augen vnnnd widerfert / frölich mag  
annemen/ auff das ich mit warheyt  
sprechen müge/ Herr ich will gerne  
mit freüden sterben / wenn vnd wie





du wilt/ Vnd ich wil den todt/er sey  
wie schnell/wie böß er sey/ wie ferlich  
er wöl/so will ich in nit fliehen/ nit  
fürchten/auch kein grauen noch kein  
schreckē dauor haben/allein dein göt-  
lich wil geschehe/ was dein eere vnd  
glori ist.

## Doctor Caspar Guttels offen Beycht.

**I**ch armer sündiger mensch/Be-  
kenne Gott meinem schöpffer/  
erlöser vñ seligmacher/ das ich mein  
lebenslang/keinen rechten starcken ey-  
nigen glauben zu Christo Jesu ge-  
habt hab/ auch kein rechte brüder-  
liche lieb gegen meinem nechsten chri-  
sten menschen getragē hab/mer auff  
gebet vnd menschen lere/meinen selbst  
verstandt/ gut/eere vnd vermügen/



denn auff götliche wort mich geflis-  
sen/dardurch ich götlich gepot üppig  
klich vnd strefflich übertretten vnnnd  
verlegt hab/ Derhalb Got/noch mei-  
nen nechsten geliebt/sunder mer Got  
geuneeeret/geschendt vnnnd gelestert/  
meinen nechsten genyden/gehaßt/Be-  
schedigt vñ veracht hab/Wie solchs  
mein ganz strefflich/verfert/vnchri-  
stlich leben/mein Gott wölt straffen  
am ernsten tag der gerechtigkeit/  
Kum̃ ich armer grosser sündler zu-  
vor in der zeyt der gnaden/lege heüt  
all meine sünd auff dein altar vnnnd  
höchsten Priester/meinen sündtra-  
ger Jesum Christum selbst/vnd auff  
sein heyligs fron creütz/Bitt also sein  
götlich gnad/Gnad mir mein Gott/  
schick mein leben/sterben vnd aufer-  
stehung in gnad/nach deinem götlich  
en willen/Amen.

## Etlich christlich ermanun- gen vnd Betrachtungen.

**D**er mensch muß an allen seinen  
wercken verzagen/ vñnd allein  
hangen an dem verdienst/ an der ar-  
beyt/ gnad vnd barmhertzigkeyt/ die  
Gott der Vater vns allen in Christo  
gegeben hat/ Vnd muß festiglich glau-  
ben/ das solchs alles/ on alle seine ver-  
dienst/ auß lauter gnaden sein sey/  
Wiewol nun diß ein rechter glaub/  
vnd an jm selbst so mechtig ist/ das er  
keines wercks bedarff/ so will er doch  
die werck anderßwo/ Gott vñ seinem  
nechsten zu eeren vñ guttem gebrau-  
chen. Denn fahet ein solch christlich  
mensch an/ Got seinen schöpffer/ wie  
ein kindt seinen vater/ hertzlich zu lie-  
ben/ vnd nit als ein knecht seinen her-  
ren zu fürchten/ Dierey! Christus in

dise welt kumen ist/ nit darumb das  
er die welt verurteylen wöl/ das ist/  
das er ein strenger ernstlicher richter  
sey/sunder als ein süßer seligmacher/  
das die welt durch in geseliget vñ Be-  
halten werd / Denn kan der mensch  
nit feyren/ nach dem er der wolthat  
durch Christum von Gott empfan-  
gen/ gewis ist/ vnd will auß rechter  
lieb/vnd solchen empfangen woltha-  
ten/nit anders dan wolthun/fordern  
vnd lieben seinen nechsten/ Vnd das  
seind die frucht/zeugnuß vnd erkund  
eines rechten glaubens/ vnd als denn  
sehet Gott an/ vnnd bessert das alles  
durch versuchung vnd ansechtung/  
dardurch der mensch ye mer vñ mer  
zu nimbt im glauben vnd der liebe/  
das im Gott so hertzlich lieb wirdt/  
das er nichts mer fürchtet / Daher  
wechst denn die hoffnung/die da ge-



wiſ iſt/das ſie Gott nit laſſen wird.

## Chriſtliche gebet oder Betrachtungen.

**O** Gütlicher Barmherziger Gott  
erlöſe vns von der ſünd des vn-  
glaubens vnd mißtrauens/mereinn  
vns den rechten glauben vnnnd ver-  
trauen / dir allein feſtigklich anzu-  
hangen / giß vns die warhaſſten ge-  
rechtigkeyt / ſtraff vns o Herr nit inn  
deinem zorn / vnd gehe mit vns nit in  
dein gericht / Amen.

O Gott / der du haſt zugesagt al-  
len den die dich mit einem rechtē glau-  
ben bitten / alles das mit zu teylen das  
ſie bitten / Wir flehen vnd ſchreyen zu  
dir / giß vns dein götlich lieb vñ forcht  
Giß vns ein rechte warhaſſte eer er-  
bierung deines götlichen namens /  
Verleyhe




Verleyhe vns gedult in allen vnsern  
verfolgungen/des leybs/guts/vñ der  
reeren/ Gib vns die rechte Mesß deins  
heyligen newen Testaments/das re-  
chte warhaffte gebet/ Teyl vns mit  
ein rechten gehorsam/die miltigkeyt/  
güttigkeyt/Barmherzigkeyt/keuſch-  
heyt/armut des geysts/ein rechte des-  
mut/vnd verlaugnuß sein selbst/vnd  
die warheyt/Gib vns einen rechten  
verstandt deines gölichen willens vñ  
worts/Gib vns frumme Prediger vñ  
Prelaten/O Herr du ewiger Beschü-  
zer vnd Beschirmer/sihe vns an mit  
den augen deiner gölichen Barmher-  
zigkeyt/vnnd erbarm dich über vns  
vnd erhör vns/Amen.

### Ein anders.



Ch ewiger Gott/ich bekenn es/  
ich klag dirs auch herzlich/das






ich ein armer elender vnnnd sündiger  
Kotsack byn/ Ich weysß aber/ das du  
mein Gott/ mein Herr vnd mein er-  
löser bist/ich weysß vnd glaubs festig-  
klich/das dein eingeborner sun Iesus  
Christus mein seligmacher ist/ vnnnd  
das er die sünd/welt/ Teuffel vñ hell  
vberwunden hat/ des allein vertröste  
ich mich/darauff bau ich on zweys-  
fenlich/darauff steet all mein hoffen/  
darinn will ich mich finden lassen/al-  
lein sey mir gnedig/ wie mir/ deinem  
warhafften zusagen nach/ gar nicht  
zweysfelt/dann du bist die warheyt  
selbst/die nymmer mer selet/Amen.

## Gebet vnd betrachtung in widerwertigkeyten.

**O** Barmhertziger Gott/ wir bit-  
ten dich / du wöllest vnns dein



götlich gnad verleyhen/ dir inn allen  
dingen festiglich zuuertrauen/ vnd  
dich/ es gehe vns wol oder übel/ zu lo-  
ben/ zu liebē vñ zu eeren/ dir sey danck  
vnd lob in ewigkeyt/ dein will gesche-  
he in hymeln vnd auff erden/ dein vr-  
teyl seind gerecht/ wir seind arme sün-  
dige creaturen/ Dein name sey gebe-  
nedeyet in ewigkeyt/ Amen.

**W**ir haben anfechtung am leyb/  
am gut/ an den eeren/ am gewis-  
sen oder der seelen/ von den menschen/  
von vnserm aygen fleysch/ vonn der  
welt/ von sünden oder vom Teuffel/  
so sollen wir vns allein auff Gott  
steuren vnd barwen/ vnd in vmb sein  
götliche gnad bitten/ vñd sprechen/  
Gott ist mein helffer vñ erlöser/ auff  
den verlaß ich mich allein/ Den/ wen  
Gott vnser Herr vnd seligmacher/

**G ij**



Bey/mit vnd neben vns ist/wer mag  
wider vns sein/dann Gott können  
wir nichts liebers vnd annemlichers  
erzeygen/dann in in zu glauben vnd  
zu vertrauen/vñ es on zweyffel da-  
für achten/er werd vns halten/was  
er vns zugesagt hat/vñ das vns sol-  
liche ansechtungen nit schaden wer-  
den/weyl er vnser seligmacher ist/di-  
ser glaub macht vns selig/dañ nichts  
seligt vns/dann das glauben vñ ver-  
trauen inn Gott/nichts verdambt  
vns/dañ der vnglaub vnd misstraw  
in in.


**So der mensch das heylig**  
**Sacrament des Fronleychnams**  
**Christi empfecht/mag er al-**  
**so gedenccken.**



**A**Wiger Barmhertziger Gott/  
ich armer sündler kun zu dir/  
zu holen gnad / heyl/ gesund-  
heyt vñ seligkeyt/ dan ich weyß mich  
der/ Bey keiner creatur weder in hy-  
mel noch auff erden zuerholen/ dar-  
umb bitt ich dich durch dein götliche  
zusagung/du wöllest mich/dz werck  
deiner hend gnedigklich annemen/  
Verleyhe vns was du heyssest/vnnd  
gib vns das du gebestest/ Amen.


## Ein gebet von allen heyligen.

**G**ütziger Got/ wir sagen dir  
danck / für alle gnaden / tugend  
vñ gaben/ die du allen deinen  
heyligen vnd auserweltsen/ von an-  
fang der welt bis her verliehen hast/  
Wir bitten dich demüthigklich / du




wöllest vns gleicher weyß/ dein göt-  
liche gnad mittheilen/ durch die fuf-  
stapffen vnnnd vorbild ires starcken  
glaubens/ vnd festen vertrauens in  
dich/ auch also in vnserm leben vnnnd  
sterben zuerfaren vnnnd zu handeln/  
Durch Christum vnseren Herren/  
Amen.

## Ein gebet des heyligen Pauli/ vmb götliche krafft vnd stercke.



**D**u dir Herr almechtiger güt-  
tiger Got/der du bist ein Va-  
ter vnseres Herren Jesu Chri-  
sti/ vnd von welchem alle sypschafft  
in hymel vñ auff erden genēet wirt/  
Biegen wir armen vnserer knye/ vnd  
mit ganzem fleyß bitten/ das du vns  
nach dem reychtumb deiner herrlig-




Keyt gebest/ das mir mit gewaltiger  
krafft gesterckt werden / durch dei-  
nen heyligen geyst/ zu dem innerlichen  
mensche/ das Jesus Christus wo-  
ne durch den glauben in vnsern hertzen  
en/ das wir in der liebe eingewurzelt  
sein vñ gegründet/ das wir möchten  
begreyffen mit allen heyligen/ welch-  
es sey die lenge vnd breyte/ die tieffe  
vnd die höhe/ möchten auch erkennen  
die liebe Christi/ die sunst alles erkent-  
nuß vbertrifft/ vnd also erfüllet wer-  
den zu aller fülle Gottes/ Amen.

Für alle menschen/ so sich  
Gott dem Herren/ mit anderer  
gebet Befolhen haben/

**D**u barmhertziger vñd ge-  
trewer hoher Priester/ in al-  
lem dem / das bey Gott ye-

G iiii





mand zu thun hat/ nach dem du ein  
ewigs Priesterthumb hast/ vnd ver-  
magst ganz auß zu bereyten/ vnd se-  
lig zumachen/ die durch dich zu Gott  
handeln vnd gehen/ Herr Jesu Chri-  
ste/ dieweyl sich ein Betrüßte person/  
welcher namen/ hertz/ anligende not/  
jammer/ schwacheyt/ krankheyt vnnnd  
Begird / du am aller besten kennest/  
mir Befolhen hat/ dich für sie zubitten  
vnd ich selber nichts tang noch byn/  
noch für mein aygene sünd / weder  
mundt noch augen auffzuthun ver-  
mag/ darzu nit weyß/ was ich bitten  
soll/ So tritt ich doch nahe zu dir/ in  
zuuersicht deiner grossen gütte/ vnnnd  
das du ein thron bist der gnaden got-  
tes/ auff das wir armen sündler/ vns  
erlangen gnad vñ Barmhertzigkeyt/  
Vnd neben mir Befelhe ich inn dein  
ampt vnd hohen Priesterthumb die



person/so mir für sie zu bitten auffers-  
legt hat/ Vnd mit vnd neben jr bitt  
ich/Hilff du lieber Herr Jesu Christ  
das es in deinem namen geschehe/für  
alle gebrechen derselben person / das  
du sie nach deinem willen zum besten  
wöllest wenden/sie inn iren ängsten  
vnd trübsalen trösten/in der ansech-  
tung stercken/in der not nit verlassen/  
in der vnwissenheit lernē/im yrtumb  
auffnehmen vñ nit fallen lassen/in der  
sünden ein ärzney/durch die bespren-  
gung deins heyligen bluts geben/vnd  
sie heyligen/inn dem todt lebendig  
machen/denn du bist das leben vñnd  
die warheyt/im gesencknuß vnd al-  
len andern verfolgungen/franckheyt  
vnd creützen/sie schützen vnd handt-  
haben/zum ewigen preys vnd danck  
sagung der gütte deines hymnlichen  
Vaters/Mit welchem dir in eynig-

Keyt des heyligen geystes / sey vñ bleib  
das reych vnd alle herrschafft / von  
an in alle ewige zejt / Amen.

## Vor dem beschluß des gebets.

**I**hr Jesu Christe / das wöl-  
lestu vns allen erwerben bey  
deinem hymlischen Vater / vñ  
wöllest vns allen aufsteylen / bekress-  
tigen vnd erheben im heyligen geyst /  
vnd im waren lebendigen glauben  
des neuen widergebornen hertzen /  
Amen.

## Der beschluß.

**G**ud bekressrige nun dises  
Barmhertziger Gott / das du  
in vns allen angefangen hast  
zu wircken / vñ deinem heyligen

Tempel/ der im hymnlichen Jerusa-  
lem ist/ Jesus Christus vnser eyniger  
hoher Priester/ mitler/ altar/ opffer  
vñ gnugthuung für alle vnser sünd  
von ewigkeyt zu ewigkeyt/ Amen.

## Dancksagung in hoffnung ferner tröstung.

**A**ch grosser Barmhertziger  
warhafftiger Got vñ vater/  
Ich sehe vnd erfar / das ich vor lang/  
durch dein heyligs wort/ gehört hab/  
hemlich das du nahend bey denen/ so  
dich in iren nöten vnd ansechtungen/  
trewlich vnd kindlich anrüssen/ vnd  
sie nit verlest / sunder gibst in krafft/  
das sie jr kreüz ertragen mügen/ vñ  
machests inen zu gleych schwer/ vnd  
doch treglich/ bis das du sie gnug pro-  
biert/ gedemütigt/ vnd zu dir gezogen





hast/sie darnach gnediglich zuerlö-  
sen/vnd zu erfrewen/ Auff das du vñ  
inen hertzlich gelobt vñ gepreyßt wer-  
dest/vnd das sie vortan in keinen nö-  
ten an deiner gütte zweyßeln/sunder  
starck werden im glauben vnd hoff-  
nung / Vorßölchs dein werck / so du  
aller liebster Gott/auch ann mir ar-  
men sünderin angefangen hast/sag  
ich dir durch deinen einigen Sun Je-  
sum Christum vnsern Herrn/ lob vñ  
danc̃ one auffhören/vnnd bitt dich/  
als den eynigen nort helffer vnd trö-  
ster/im nam̃c̃ deins allerliebsten suns  
Jesu Christi/vnnd vmb deiner war-  
heit vnd ehre willen/ du wöllest mei-  
ne schwachheit weytter stercken vnnd  
erhalten/bis zu endlicher erlösung vñ  
erfrewung/Auff das ich dich meinen  
Got vñ Herrn/ mit allen gläubigē in  
ewigkeit lobē vñ preisen müg/Amen.



**O** Laß mich allenthalbē genießen  
gegen dir/deines lieben suns Je-  
su Christi meins Herrn vnn̄d Hey-  
lands/ Amen. Wehre allem vbel/  
vnd forder alles gutt/nach art deiner  
götlichen gütte/vnn̄d grossen Barm-  
herzigkeit / Im namen durch Chris-  
tum vnsern Herren.

## Ein gepet des morgens zu peten.

**I**ch dancke dir mein hymnlischer  
vatter/durch Jesum Christ dei-  
nen liebenn Sun/ das du mich diese  
nacht/für allem schaden vnd fahr be-  
hütt hast/Vnd bitte dich/du wöllest  
mich disen tag auch behüten/vor sün-  
den vnd allem vbel./ das dir all mein  
thun vnn̄d leben gefalle/ dann ich be-  
silhe mich/mein leyß vnd seele/vnd al-




les in deine hende/ dein heyliger En-  
gel sey mit mir / das der Böse feyndt/  
keine macht an mir finde/ Amen.

**D**es abends segne dich  
mit dem heyligen creutz vnnnd sprich.  
Des wald Gott/ Vater/ Sun/ heya-  
liger Geyst/ Amen.

**D**arauff sprich diß Betlein

**I**ch dancke dir mein hymlisch  
vater/ durch Jesum Christ/  
deinen lieben sun / Das du mich disen  
tag gnediglich Behütt hast/ vñ Bitte  
dich / du wöllest mir vergebenn alle  
meine sünde / wo ich vnrecht gethan  
hab/ vnd mich dise nacht gnediglich  
Behütten/ Denn ich besilhe mich/ mein  
leyb vnd seele/ vnd alles in de ne hende/  
dein heyliger Engel sey mit mir/  
das der Böse feindt keine macht an mir  
finde/ Amen.



## Ein gepet zu nutz den Schwangeren frawen.

**O** Allmechtiger ewiger Gott / vnd  
Barmhertziger vater / ein schöp-  
fer aller dinge / der du gnedigklichen  
gesegnet hast / Man vnd Weyß / vnd  
gesagt / Seyd fruchtbar vnnnd meret  
euch / auch hastu der frawē ein creütz  
aufferlegt / das sie vil künernuß ha-  
ben sol wenn sie schwanger geht / vnd  
sol inn schmerzen geberen / das creütz  
hastu geheiligt durch deinen lieben  
Sun vnsern herrn / der vns von dem  
fluch vnd sünden erlöset hat / Wir bi-  
ten dich güttiger vater / herr vñ Got /  
du wöllest die frucht meines leybes /  
dein eygen werck / erhalten vnnnd be-  
waren / vnnnd vnter dem creütze im  
schmerzen meiner geburt / nicht ver-  
derben lassenn / sondern gnedigklich



vnd mit friden entbinden/ Durch Je-  
sum Christum vnsern Herrn/ Amen.

**G**emein pitt vmb Gottes  
forcht vnd narung des glaubens.

Der cxxviii. Psalm.

**G**ib mir lieber Herr/ das ich dich  
alleyn söchte/ vnd gehe auff dei-  
nen wegen/ das mir wol sey/ vnd das  
du mich/ vnd alles das mein segnest/  
durch vnser hend arbeyt/ mich neresst/  
mich fruchtbar machest/ wie ein fru-  
chtbarn weynstock/ der die wende er-  
füllet/ vnser e kinder gezogen/ vnd gü-  
tig/ wie die ölzweyge/ O Herre segne  
vns an leyß vñ seele/ auß Zion deiner  
heyligen wonung/ das wir vnser lebē  
lang/ yñmer dar sehen das glück vñnd  
auffnehmen Jerusalem/ Nemlich/ das  
dein glaubig volck/ jm glauben dei-  
nes worts gestercket/ allen seinen feyn-  
den ob-








den obsiege / das wir auch sehen vil  
kinder des glaubens / vnnnd frid vber  
Israel / Amen.

## Ein gepet vor der Predig.

**E** Allmechtiger ewiger Got / vnd  
Barmhertziger gütlicher vatter /  
Nach dem alle vnser heyl darin ste-  
het / das wir einen rechten verstand  
habē deines worts / So verleyhe vns  
allen / das vnser hertze / gestreyet von  
weltlichen geschestē / mit allem fleiß  
im glauben / dein heyliges wort hōre  
vnd fasse / damit wir deinen gnedigen  
willen recht erkennen / lieben / vnd mit  
allem ernst nachuolgen / dir zu liebe  
vnd eeren / durch Jesum Christū vn-  
sern Herrn / erlöser vñ heyland / Amē.

## Ein beschluß nach der Predig.



A decorative border surrounds the text block. On the left, there are large red and blue flowers. At the bottom, a lion is depicted walking towards the left, surrounded by green foliage and smaller flowers. The right edge of the page shows the continuation of the text from the adjacent page.

**A**lmechtiger barmhertziger Gott  
vnnnd vater / Der du vns durch  
deinen Sun zugesagt hast / was wir  
dich bitten in seinem namen / das wil  
tu vns geweren / vnd darzu auch hast  
Befolhenn durch deinen geyst / für die  
Oberkeyt / vnnnd für alle menschen zu  
bitten / So bitten wir dich von hertzen  
durch Jesum Christū deinen ge  
liebsten sun vnsern heilandt / Du wöl  
lest die hertzen vnser Herr des Kei  
sers / aller Fürsten / vnd Fürsten Ke  
then / auch vnser Landsfürsten / vnd  
diser Stat oberkeyt vnd Regenten /  
mit erkentnuß deines heyligen Euan  
gelij erleuchten / Auff das sie vnd alle  
gewaltigen / dich für iren obersten vñ  
rechten Herrn erkennē / dir mit forcht  
vnd zittern dienen / vns die wir deiner  
hende werck sind / vnd schefflein dei  
ner weyde / nach deinem willen vnnnd

wolgefallen schutzen vnn̄d regieren/  
vnd allen menschen allent halben wöl  
lest verleyhē / zum erkennnis der war  
heyt zu kumen / sunderlich vñser gemei  
ne / die wir in deinem namen versamb  
let sind / sende deinen heyligen geyst /  
den meyster vnd leter / welcher dein  
gesetze in vnser hertzen schreibe / vnser  
blindheyt wegneme / vnd vns vnser  
sünd zu erkennen gebe / denen sunst ire  
schande vnd schnd̄digkeyt vn̄bekannt  
ist / vnd ist leider todt / O Herr mache  
sie lebendig / vnd erleuchte vnser au  
gen / das wir die warheyt sehen / vnd  
warhafftig erkennen mügen / den̄ in  
vns nichts ist den̄ lauter sünde / todt /  
helle / vñ der woluerdiente zorn Got  
tes / vnn̄d also zu dem reichen Brunne  
deiner gnaden vnd gütte / hunger vñ  
durst gewinnen / vnd die mit dancke  
annemen / welche du vnns durch dei



nengeborenen Sun hast zugestellet/  
welcher ein mensch/vnd vns gleych-  
förmig worden/on sünde geliden/ge-  
storben vnd auffgestanden ist / auff  
das er vns vō sünden/tod/teuffel vñ  
helle errette/vñ zu der auffstehung  
zum erbtreyl des reychs Gottes brech-  
te/Wir bitten dich O Herr vñ vater/  
vernewe vns im geyst vnfers gemüt-  
tes / Betleyde vns mit dem newenn  
menschen/der nach deinem willen ge-  
schaffen ist/inn warer gerechtigkeit  
vñ heiligkeit/Bestettige vnsern glau-  
ben/liebe vnd hoffnung/ Vñ gib vns  
gnade zu bitten/wie vns Christus vn-  
ser Ieremeyster Befolhen hat/vnd von  
hertzen zu sprechen/O vnser vater im  
hymel ꝛc.

Eine Beychte oder be-  
kenntnuß.



**H**ymelischer vater ewiger got /  
du weyffest das ich ein grosser  
sünder bynn / grösser denn ich erzelen  
kan / nach dem du ein forscher der her-  
zen vnd nyren bist / Vnd allest weist /  
was ich von meiner jugent auff / mit  
meinen sündigen gedancenn / geber-  
den / Worten vnnnd wercken / inn allem  
meinem wesen begangen vnd gethan  
habe / Welchs alles für dir als ein vn-  
saubers bluttiges tuch vnreyne / mit  
schweren sünden behafft vn beschmi-  
ret / denn ich hab gesündigt vn böß-  
heyt geübet / Darumb thu ich kundt /  
meine sünde / vnd bedecke meine misse-  
that nit / sunder bekenne dir meinem  
Herrn / alle meine vbertrettung wi-  
der mich / Vñ bitt dich / wende deinen  
zorn vnd grimm von mir / vnd wasche  
mich von meiner missethat / vnd rey-  
nige mich von meinen sünden / O Her

**K** iij

reich kum̃ nit in meiner gerechtigkeit/  
ein solches vonn dir zu bitten/ sūder  
ich kum̃e in deinen götlichen zusagen/  
so du vns vnñd vnsern veter allezeyt  
versprochen hast / sūderlich bitte ich  
dich/durch deinen allerliebsteñ sun/  
vnsern herren Jesum Christum/ der  
vns warhafftig hat zugesagt/ Was  
wir dich bitten in seinem namen/das  
wiltu vns geben/darauff vater aller  
Barmhertzigkeit bitte ich dich / gehe  
nit ins gericht mit deinem knechte/  
deñ für dir wirt kein lebendiger recht  
fertig sein / O herr erhöre meine bitt/  
vnd vernym mein ruffen/ vnñd vmb  
deines worts willenn/ erbarme dich  
meiner nach deiner gūte / vnñd tilge  
meine sūde nach deiner groſſe Barm  
hertzigkeyt/nicht bitte ich deine Barm  
hertzigkeit vber das kleine/damit du  
dich zeytlich vber die erbarmest/suñ

der nach deiner grossen Barmhertzig-  
keyt / damitt du dich vber der seelen  
not erbarmest / darumb o Herr / vmb  
deines namens willen / wirst du dich  
erbarmen vber meine sünde / vnd mir  
alle meine missethat vnd schulde / gne-  
digklich vergebe / durch Jesum Chri-  
stum deinen sun vnsern Herrn / erlöser  
vnd heylandt / der mit dir lebet vnd  
regiret in ewigkeyt / Amen.

Ein gepet / So der mensch  
zum hochwirdigem Sacrament  
gehen will.

**A**llmechtiger ewiger Barmher-  
ziger Gott / ich armer elender /  
Bin beruffen vnd geladen worden / zu  
deinem hohen kostreichen abentmal /  
In welchem du deinen eygenen leyb /  
dein heyliges blut / mir vñ allen glau-  
bigenn zu einer speyse / vnd zu einem

¶ iij






tranc̃k/hast gnedigklich bereitet/nun  
bekenne ich mich warlich für einen ar  
men sünd̃er/der ich auch der wenig  
sten gnade vñwirdig byn/ Ich glau  
be aber on allen zweiffel/das du allei  
ne deinen leib vnd blut für vns gege  
ben/mir mittheilest als ein starck zeich  
en/deiner warhafftigen zusage / als  
du dem sünd̃er gelobet hast/der sich  
erkennt/vnd seinen vertrauen alleyn  
zu dir stellet / seine sünde gnedig  
klich zuuergeben / Vnd glaube festig  
klich/on allen yrrhum̃/das der leyb/  
den ich nun empfangē/ist der leyb der  
für mich hin gegebeñ wirt in den tod/  
Vnd das blut ist für meine sünde ver  
gossen worden / Ich weiß auch wol/  
das ich dazu vñbereyt/vnd nicht wir  
dig bynn / das du gehest vnter mein  
dach / Diuweyl ich aber nit vermag  
noch verhoffe vonn meinen sünden/

durch meine eigene reue/Reichte vnd  
Busse/auch durch keiner Creatur hül  
ffe oder macht gereiniget werden vñ  
bereyt/So glaube ich vnd begere vñ  
ganzem hertzen / vñ dir entlediget  
vnd gereiniget werden/In der zuuer  
sicht/will ich auff deinen götlichen be  
felch vnd zusage zu dir künien/vñnd  
dich empfangē/das ich bey dir alleine/  
meiner armen elenden betrübten Con  
scientien/rechtfertigkeith/trost vnd ru  
he möge finden/das du in mir bleiben  
mügest/vñnd ich in dir/Ich habe auch  
keinen zweiffel vñnd sorge/das deine  
kressstige wort warhafftig an mir ar  
men sündler erfüllet sollenn werden/  
Amen.

**Ein ander schön gepet/das**  
man mit warhafftigem glauben im  
hertzen bedencken vñnd sprechen soll/  
h v

wen man zu gottes tische gehet.

D. Mart. Luth.

 Herr/was ist das/das ich nicht  
würdig bin/das du gehest vnter  
mein dach // so byn ich doch notdürfft  
ig deiner hülffe/vnnd begirig deiner  
gnaden/das ich müge selig vnd frum  
werden/nun kum̃e ich in keiner ander  
zuuersicht / denn das ich deine süsse  
wort gehört habe / damit du mich zu  
disem tische ladest/vnd sagest mir vn  
würdigem zu/ Ich soll vergebung der  
sünden haben/durch deinen leib vnnd  
Blut/so ich esse vnnd trincke inn disem  
Sacrament/O lieber herr/ ich weiß  
das deine götliche zusage vnd wortt  
warhafftig sind / da zweyffel ich  
nicht an / Vnd darauff esse ich vnnd  
trincke mit dir / mir geschehe nach dei  
nen Worten/Amen.





Wenn du das Sacrament  
empfangenn hast / so falle nider auff  
deine knie / vnd Bedencke dise wort inn  
deinem hertzen.

**O** Herr vereynige mich mit dir  
durch deine zusage / vnd wircke  
in mir alle gutte werck / vnd bleib inn  
solcher weyse mit mir / auff das ich  
ewigklich bleibe in dir / Amen.

Ein gemeine dancksagung  
nach dē sacrament. D Mart Luth.

**W**ir danckenn dir Almechtiger  
Herr Got / das du vnns durch  
dise heilsame gabe hast erquicket / vñ  
bitten deine Barmhertzigkeyt / das du  
vns solchs gedeyē lasset / zu starckem  
glauben gegen dir / vnd zu brünstiger  
liebe vnter vns allē / durch Jesus Chri  
stus vnfers Herrn willen / Amen.

## Darnach sprich.

**I**ch dancke dir o du edler Jesu/  
das du mich zu diser frummen spei-  
se beruffen hast/ Ich dancke dir vonn  
ganzem hertzen/das du mir beschey-  
denheyt vnd andacht dazu gegeben  
hast/ Ich dancke deiner gnaden/das  
du mich mit glauben vñ liebe erleuch-  
tet hast/Vñ mich mit dir selbs gespei-  
set/vnd mit deinem blutte getrencket/  
vnd mich mit deiner klaren Gottheit  
erfüllet vnnd vmbgeben hast / O du  
lieber Jesu/bleyb bey mir / den ich er-  
gebe mich dir/vnd verlasse mich auff  
dich/das ich ewig sey in dir.

## Ein ander gepet.

**E**lobet | sey Gott vnser vatter/  
der vns würdig geschätzt hatt/  
zu disem reichthumß seiner gnaden  
vnd seligen speyse/zukunnen/Wir bit.




ten dich vater / du wöllest deinen heyligen geist / in vns wachsen vnd zunemen lassen / durch Jesum Christum vnsern Herrn deinen lieben sun / der mit dir lebet vnd regiret in eynigkeyt des heyligen geystes / nun vnd zu ewigen zeiten / Amen.

**Ein Gepet wider das wüthen / vnd toben des teuffels / vnd aller tyranny.**

**M**ein allerliebster herr vn̄ heylig landt Jesu Christe / Der du alleine mit deiner götlichen krafft / zu treten hast den kopff der schlangen / vnd alleine gewaltig zubrochen vnd zurissen hast / das reich des Teuffels / Wir bitten du wöllest vnns armen schwachen klein glaubigē / wider den listen / anlauff des bösen geystes / vnd










seinem grossen ytzigem ernst/vñ grim-  
migen zorn seiner gliedmassen/damit  
er vns von deinem götlichem worte/  
gedenckt abzuschrecken vnd abzuzie-  
hen / gnediglich schützen vnd erhal-  
ten/Also das wir in deiner götlichen  
allerwarhafftigstenn zusagen vñnd  
wortten / bisß ann das ende vnser le-  
bens / vnuerzagt wider alle pforten  
der helle / inn einem warhafftigem  
rechtem Christlichem glaubenn / Be-  
harren vnd bleiben mügen/Amen.

## Ein gepet vmb bestendig- keyt des Glaubens.



**M**ein lieber Herre Jesu Christe/  
du trewer heyland/ dieweil du  
vns die erhörung in vnserm gepet ver-  
heissen vñnd zugesagt hast/ Bitte ich  
dich von grund meines hertzens/me-  
re vnd stercke mir meinen schwachen



glauben/vnd laß mich nit fallen/oder  
versincken im glauben/Auch nit zag-  
hafftig werden in der verfolgung dei-  
nes götlichen namens vnnnd worts/  
Wo es aber auß blödigkeyt des fley-  
sches geschehe/ Als denn sihe mich an  
wie Petrum / mit den augen deiner  
Barmhertzigkeyt/vnnnd gib mir reue  
vber meine sünde/mit kreftiger Begier  
zu erkennen deine gnade / Damit ich  
deiner nit beraubet/sunder dein miter  
be vnd Bruder bleibe/ O aller liebster  
herr Jesu Christ/ sende mir einen En-  
gelischen geyst / der mich inn meinem  
hertzen lere vnnnd vnterweyse/ gleych  
wie Marien deiner werden keuschen  
Mutter / der reynen Juncckfrawen/  
durch den Engel Gabriel geschach/  
die dadurch im glauben gestercket/  
vnd bekrefftiget wart/ Also verleihe  
mir auch die gnade durch deinen vn-

sichtbarn götlichen geyst/ gleych wie  
du dieselbige verlyhen hast/ deinen lie  
ben jüngern/ vnd allen auferwelten/  
die bey dir inn der ewigen seligkeyt  
wonen/ das ich dir durch einen  
rechtschaffenen Christlichen  
glaube/ also krefftiglich ein  
geleybet werde/ damit ich  
alle gewalt der hellischen  
pfortē/ vñ alle jrdische ee  
re/ freude/ pompe/ welt  
liche weißheit/ schwach  
heit/ hin weg werffe  
vñ verachte/ Vñ dich  
alleyne in mir/ nach  
deinem gnedigen  
willenn/ wircken  
lasse/ Amen.



**Bemeyne gepet / Die man**  
pflegt Collecten zu nennen / für aller-  
ley not vnd gebrechen.  
Für die diener des worts Christi.

**A**lmechtiger gütlicher Gott /  
vnd vater vnsers herrn Jesu  
Christi / der du vns ernstlich Befolhen  
hast / das wir dich Bittenn sollen / für  
die arbeyter inn die ernde / das ist für  
trewe Prediger deines worts / Wir  
bitten deine grundtlose Barmhertz-  
igkeyt / du wöllest vns rechtgeschafne  
lerer vnnnd diener / deines Götlichen  
worts zu schicken / vnnnd denselbigen /  
dein heylsames wort in den mund ge-  
ben / vnd in das hertze / das sie deinen  
Befelch getreulich aufrichten / vnd mit  
predigen wider leren / das deinem hei-  
ligen worde entgegen sey / Auff das  
wir durch dein heylsames wortt ver-


manet/geleret/gespeysset vnnd getrö-  
stet werden/ Mügenn thun was dir  
gefellet / vnnd vns fruchtbarlich ist/  
Gib Herr deiner gemeynen / deinen  
geyst / vnnd götliche weysheyt/ Das  
dein wort vnter vnns lauffe / wachse  
vñ fruchtbar sey/ das also die diener/  
dein wort mit aller freydigkeyt / wie  
sichs gebürt reden/ vnd deine heylige  
Christliche gemeine gebessert werde/  
vñ mit beständigem glauben dir die-  
ne / vnnd in der erkentnuß deines na-  
mens bestendig bleybe/ durch Jesum  
Christum vnsern Herrn/Amen.

## Für die Oberkeyt.

**B**armhertziger himlischer vater/  
In welches hende/ aller menschen  
gewalt vnd oberkeyt stehet / vonn  
dir eingesetzt zur straffe der vbelthe-


ter/vnd zum schutz der frummen/ Inn  
welchs hende auch stehen alle recht  
vnd gesetze / aller lender/Wir bitten  
dich / sey gnedig vnserm Herrn dem  
Keyser/allen Künigen vnd Fürsten/  
sunderlich vnserm Landsfürsten vñ  
Herrn A. vnd dem Radt vñnd Re-  
genten diser Stat/vñnd aller orden-  
licher Oberkeyt/damit sie das welt-  
liche schwert / das du inen befolhenn  
hast / recht füren mügen/Umb scha-  
tige sie mit krafft des allerhöchsten/  
erleuchte vñnd erhalt sie bey deinem  
götlichen namen/Las sie dein heylsa-  
mes wort von hertzen lieb haben/vñ  
darüber feste halten/vñnd sie ja nicht  
lassen dasselbige verfolgen/ Gib inen  
lieber Herr weyßheit/vnd einen rech-  
ten verstand/vñnd ein fridsam regi-  
ment/Auff das sie alle ire vntertha-  
nen/in der warheyt vñ gerechtigkeit





die dir gefellig ist / regiren vnd beschir-  
mē / auch mein lieber Gott / friste inen  
jr leben lange / nach deinem willen /  
Vnd weyl das gerichte dein ist / vnd  
sie an deiner stette sitzen / gib inen gna-  
de also zu regiren / das dein heyliger  
name durch sie geheyliget vnd geprey-  
set werde / vō nun an bis in ewigkeyt /  
das helffe inen der Herr Jesu Christ  
dein geliebter Sun / Amen.

## Für den gemeinen frid.




**A**lmächtiger Gott vnnnd ewiger  
vater / ein künig der eeren / vnnnd  
ein Herr hymels vnnnd der erden /  
durch welches geyst / alle ding regi-  
ret / durch welches verschung alle  
ding geordnet werden / Du bist ein  
Gott des frides / von dem alleine alle  
eynigkeyt zu vns kumbt / Wir bitten

dich durch vnsern herrn Jesum Chri-  
stum / du wöllest vnns vnser sünde  
vergeben / vnd mit deinem götlichen  
fride vnd einigkeyt begnaden / Damit  
wir in fürchte vnd zittern / deinem na-  
men dienen / vnd allzeyt von vns ge-  
preyset werdest / Amen.


### Für alle vnser sünde.

**B**armhertziger Got vnnd hym-  
lischer vater / des barmhertzig-  
keyt kein ende hat / der du langmütig /  
gnedig / vnd von grosser gnaden vnd  
trewe bist / vnnd vergibst alle misse-  
that / vbertrettung vnnd sünde / Wir  
haben leyder gesündigtet mit vnsern  
veteren / wir haben mißgehandelt / vñ  
sind gotlos gewesen / vnnd dich oft-  
mals erzürnet / dir allein haben wir  
gesündigtet / vnd vbel für dir gethan /  
aber Herr gedencke nicht ann vnser




vorige missethat / laß bald deine barm-  
herzigkeyt vber vns groß sein / denn  
wir sind elende worden / hilff vns got  
vnser heyls / vmb der eere willen dei-  
nes namens / erlöse vns vnnd vergiß  
vns vnser sünde / Durch deinen sun-  
n vnsern herrn Jesum Christū / Amen.

## Für die fruchte auff dem felde.



**O** Herr Gott almechtiger vater /  
der du durch dein ewiges göt-  
liches wort alle ding geschaffen hast /  
segenest vnd erhelst / Wir bitten dich /  
das du dein wort / vnsern herrn Jesū  
Christum / vnns wöllest offenbaren /  
vnnd in vnser hertzen pflanzen / da-  
durch ann vnns gesegnet werde / mit  
fruchtbarem wachsen / vnd götliches  
gebrauch / vnser ecker / wysen / vnnd





alles was zur leyblichenn notturfft  
dienet/ Durch deinen Sun/vnnsern  
Herrn Jesum Christum/ Amen.

## Für vnser feynde.


**A**lmechtiger ewiger Gott / der  
du vns besolhen hast/ durch dei  
nen lieben sun vnnsern Herren Jesum  
Christum/ das wir vnser feinde lieb  
haben sollen/ Vnd denen guts thun/  
die vns schaden/vnnd für vnser ver  
folger bitten / Wir schreyen ernstlich  
zu dir / das du alle vnser feinde gne  
digklich wöllest heymlichenn / ware  
rewe vber ire sünde verleyhen/ Vnnd  
inen mit vns/sambt der ganzen chri  
stenheyt / ein gotfürchtig freündtlich  
vnd rugsam gemütte vnnd hertz ge  
ben/ Durch deinen lieben sun vnnsern  
Herrn Jesum Christum/ Amen.

## Für die yrrenden im glauben.

**B**armhertziger gnediger Gott/  
vnd vater/wir bitten dich ernst  
lich vnd mit ganzem hertzen/du wöl  
lest alle die ihenigen / so vom Christ  
lichem glauben abgefallen/oder sunst  
in etlichen stücken des glaubens irren  
vnnnd mit falscher schedlicher leere Be  
hafftet vnnnd vergifft sind/ Veterlich  
heymsuchen vnd wider bringen zum  
erkentnuß ires yrthums/das sie einen  
lust vnd wolgefallen kriegen/inn dei  
ner bestendigen einfeltigen vnd ewi  
gen warheyt/durch vnsern herrn Je  
sum Christum/Amen.

## Wider die Anfech tung.





**A**lmächtiger ewiger Gott/ Ein  
trost der trawrigen / eine stercke  
der schwachen / laß für dein angesich-  
te künien / die gebet aller der / die in Be-  
trübnus vnd anfechtungen zu dir er-  
seüßgen vnd schreyen / das sie merck-  
en vnd befinden deine hilffse vnd Bey-  
stand / in der zeyt ihrer not vñ Betrüb-  
nus / Durch Jesum Christum vn-  
sern Herrn / Amen.

Ein gemeyn gepet für alle  
menschen.

**A**lmächtiger ewiger Got / der du  
wilt das alle menschen genesen /  
vñ zum erkentnus / deiner Götlichen  
warheit künien / wir bitten deine göt-  
liche maiestet / durch Jesum Christū  
deinen eynigen sun vnsern Herrn vnd  
heylandt / du wöllest deine götliche

**I v**







gnade / geyst vnnnd hülffe mitteylen  
aller ordenlicher Oberkeyt / das sie  
wol vnd friosam regiere / allen Chri=  
stlichen dienern deines heyligen göt=  
lichen worts / das sie lauter vnd reyn  
das wort predigen / vnnnd fruchtbar=  
lich leren / Vnnnd wöllest durch deine  
Almechtige gewalt / widerstandt  
thun / allen denen die dein heyliges  
wort hassen / vnnnd mitt falscher leere  
vñ vnordenlicher gewalt verfolgen /  
sie erleuchten / vnd zum erkentnuß dei=  
ner warheyt führen / au ff das wir alle  
in einem stillen rüigem / vnstrefflich=  
em leben / dem reichthum deiner göt=  
lichen gnaden / durch einen reynenn  
glauben leren / vnd dich eynigen wa=  
ren Got vnd herrn vber alle Herrn /  
mit volkummenem hertzen / in aller hey=  
ligkeyt vnnnd reynigkeyt / so dir gesel=  
lig ist / mügen dienen / Durch vnsern

Herren Jesum Christum/Amen.

Ein gepet für die Pestilētz  
D Marthinus Luther.


 Herr Gott du weyssest / was  
wir für eine arme schwache crea-  
atur sind / Laß uns doch nicht entgel-  
ten / vnser schwachens glaubens / vñ  
grosser vndanckbarkeyt für dein hey-  
ligs wort / Mach du uns doch frum /  
vnd stercke vnsern glauben / vñnd er-  
barm dich doch vnser / vñnd st. affe  
vnser böshēyt mit barmherzigkeit /  
vñnd nym von uns gnedigklich / die  
wol verdiente straffe der Pestilētz /  
Auff das dein armes heufflein / nicht  
so jemmerlich müge zustrewet wer-  
den / vñnd das sich deine feinde nit mü-  
gen freuenn vber vnser glaubens  
schwacheit / vñ dadurch dein wort







vnd straffung verachten / Das gib  
vns du aller barmhertzigister vater /  
durch Jesum Christum deinen lie-  
ben Sun vnsern Herrn / mitler vnd  
vorsprecher / Amen.

Ein ander gepet für eine  
eyntzle person / so angefochten wird /  
von wegen Götliches worts.



**O** Herre Got / Schöpffer hymels  
vnnnd der erden / Alle ding sind  
vnter deinem gebiete / vnd ist nichts das  
da möchte widerstehen deiner ma-  
iestet / Darumb byge ich die knie mei-  
nes hertzens / für deiner götlichen ho-  
hen maiestet / vnnnd bitte dich durch  
deinen eingebornen sun Jesum Chri-  
stum / durch die vergiffung seines theu-  
ren bluts / das du woltest mit barm-  
hertzigigen augen ansehen / den diener  
deines heyligen worts. **A.** der vom  
Sathan / dem feynde deines heylig






gen worts / schwerlich wirdt ange-  
fochten / geschlagen / vnd hart gepey-  
niget / dann der böse feyndt / gedencet  
nicht alleyne in außzutylgen / sunder  
auch dein heyligs wortt selbst zur  
schwacheyt setzenn / O Herre Gott /  
steure vnd were seiner Bosheyt vnn-  
d hoffart / Auff das sich nicht mügenn  
frewen die feynde deines worts vnn-  
d sagen / Wo ist ihr Gott? O Herr zur-  
stewe vnd zustöre alle / die sich erhe-  
ben wider dein wort / mache sie alle  
zu schandenn / O Herr vnser Gott /  
bey dir ist alle vnser hülffe vnd trost /  
ach erhöre eylend vnser gepet / kere vn-  
ser Betrübnus in eine freude / Laß dei-  
ne handt sein vber disen. 17 / der doch  
ist ein trewer diener deines worts /  
Leytte in / vñ erhalt in / in deiner war-  
heyt / stercke in inn deiner erkentnus /  
vnd stehe im bey gewaltiglich / in al-

ler seiner anfechtung vñ frantcheyt/  
leybes vnd der seelen/ vnd Behütte in  
Barmherziglich für dem geyste der  
hoffart / vnd volbringe gnedigklich  
das werck/ das du inn im hast ange-  
fangen/zu deinem Götlichen lobe vñ  
eere/das verleyhe vns du aller Barm-  
herzigster vater/durch Jesum Chri-  
stum deinen allerliebsten sun vnsern  
Herrn / erlöser vnd mitler/Amen.


Ein seggen Psalm.lxxij.


**G**ut sey vns gnedig vñnd Barm-  
herzig/vñ gebe vns allen seinen  
Götlichen seggen/er lasse vns sein ant-  
litz erleuchten/das wir auff erden er-  
kennē seine wege/ Es segene vns Got  
vnser Got/ Es segene vns Got/ Vnd  
gebe vns seinen frid/Amen.


Gedruckt zu Nürnberg  
durch Jobst Gutknecht.



















78



